



空明子詩集卷之三

古婁李節珊先生選

華亭張榮景桓著

出門行

一日行十里十日行一百算來百歲光陰尚餘四十年載  
趁此怱怱碌碌再著幾兩屐天下高山大川俱遊遍猶  
勝無端駒過隙不然閉戶老牖下得毋天公爲我深嘆  
惜老妻聞予言不覺笑啞啞厄音無論筋骨十分衰但看  
雙鬢已全白在家尚且攜杖走一旦欲行誰逼迫子女  
聞予言老大吃一嚇兒啼女哭不暫停怕我出門藏我  
憤阿爺阿爺頗失策暮年何苦反行役况乎水有毒蟲  
與砂磧山有豺狼與白額豈不聞烏有言行不得行不

得也哥哥莫將性命輕拋擲朋友聞予言咸來吐肝膈  
茫茫造化總無主只可閉門聊自適既無媚骨趨時輩  
但恐山神野鬼見汝亦辟易吁嗟乎口如河鬚似戟耳  
目既不肯盲聾手足又未甘跼踖自以爲頗能仙頗能  
釋光明大道我獨闢君不見天之色有時黑有時碧有  
時黃有時赤與時推移天盡然違天不祥恐冥責予聞  
言覺耳逆放開手莫嘖嘖天地苦窄隘勉強作安宅千  
年一瞬同朝夕九州四海不盈尺朝更暮改如博奕請  
決計弗阻隔拋管城棄書籍絕嗜好忘形迹踏遍名山  
餐松栢煉成真炁銷陰魄洪厓肩隨意拍老子座上兄  
洞賓門下客劃然大嘯出門去若遇長庚倒琥珀

變行路難

前有深淵無渡我河後有高山無陟我阿君子出門有  
大道坦然由之無畏塗况乎渡河實何害蛟室無風復  
無波况乎陟阿亦不妨天清日朗虎弗過兼之深淵可  
以寫我之胸襟高山可以發我之浩歌嗚呼日月逝如  
梭曷不周流宇內且婆婆毋致山水笑人老漁叢

猛虎行

上帝本好生何爲來猛虎高山跨秦晉巨澤連吳楚月  
黑悲腥風遙遙且濶步一吼山谷動雷霆逞餘怒跳躍  
直無前豺狼安足數終歲飮人肉誰能飽其餓幸未生  
角翼擇人於道路草纒紛霧氤氳陰雲慘慘愁夕曛卒

空明子言集卷之三  
然遇之曷以云治民食民封使君牛哀耶李耳耶究不能辨其名之所以分

君不見

閒房高臥望吳山石上苔生虎豹斑君不見落日銜山  
山欲赤青山空莖如花色

叢桂歌

小山叢桂發恰直中元節風雨動連宵餘芬猶酷烈造  
物真不仁簸弄亦太拙若非我輩實多情此花此恨何  
由雪飛箋速召客嘉客不我絕巢許三四輩餘子皆英  
傑雖無佳肴陳旨酒頗芳冽人生適意行志耳此腰何  
苦侯門折爾我同是冰玉姿一塵不染本高潔在木直

並松柏操在器願作錚錚鐵且痛飲莫辭頻世間短夢  
常如春請看門外名利子昨日招魂秀水濱余也更屬  
烟霞相豈堪消此十丈塵座中不少折桂手屈來且作  
看花人

燈夕歌

上元甲子上元節花燈爛熳魚龍熱時值陽春歌白雪  
歌聲亮處笙簫噓戲指紅裙逐隊行輕狂子弟同心結  
同心結今同心結常向玉梅低處說君不見古之人元  
夕觀燈惑妖姬一朝性命徒摧折

夢上天

夢上天爲君言玉皇贈我珊瑚鞭一鞭五嶽走如電再

鞭滄海成桑田渴飲瓊漿劈麟脯下視十洲三島若浮  
煙再贈七寶劍暗室橫空掣匹練蛇神牛鬼見應愁若  
展江河蛟室旋寶藏此劍徧九有辨奸別偽借汝口小  
臣豈敢冤稽首上睨前休言忠佞難盡識卽欲指之誰  
合先何不鼓鑄換洪鑪鎔化三千大千皆英賢此鞭細  
思更無用賴有山水醒殘夢除卻山水但見人使我終  
朝欲長慟願將鞭劍還睨明康衢鼓腹樂昇平閉門莫  
與門外事一丘一壑完餘生生平不作繁華夢此夢覺  
來已五更

閤步有感

性根不滅還真我訪舊城東行道左君不見紛紛來往

人欲狂路岐何處不亡羊

中山狼行

世道日流日復否中山忽有豺狼起虎踞中山日噬人  
陡逢獵者呈其技此狼見之猶逞雄張牙舞爪來相衝  
獵者不過一二輩持弓挾矢能戰攻碧水吹沙山谷暗  
白雲曠日蒼天空遙聞刺刺風吞木忽見啼鳥驚過目  
此狼跳躑性難馴時聽天涯野鬼哭獵者爭強蜃噬齒  
奮身直欲擦其死捉縛此狼在箇中此狼自問無生理  
何意士人見此獸忽然長揖來相救此獸雖然非人形  
釋之寧不感君情自是前生造下孽今生故作四蹄行  
君不見陸家黃耳能寄書寧謂此狼竟不如又不見楊

家黃雀贈玉環寧謂此狼性獨頑獵者聞言卽相許憑  
君縱放草莽處士人因解此狼縛作別獵者行路各隨  
其所之看其樂惡風一過鳴驚籜此狼操心非我徒便  
謂無毒不丈夫由來恩處易成怨借君一啖充腸枯士  
人此時計無出呼天號地聲嗚嗚忘吾大德卒不報微  
軀那足供殘暴救之反以受其吞此仇此恨憑誰告豈  
不聞淮陰一飯每不忘千金一贈名姓揚江上至今傳  
漂母行人誰不相誇張急急尋踪問三老牛兮樹兮烏  
足道開諭還憑遇老翁木落山高發長嘯狼見老翁心  
轉懼山色濛濛迷古樹倏爾萬籟盡寂然西風一過日  
將暮此狼俯伏喘無聲老翁舉杖顏色怒腰間解帶縛

此狼匣中寶劍千金鑄老翁拔劍斫此狼此狼此時應  
悔悟悔時悔卻仇報恩悟時悟卻天道循環原不錯

甲子歲開海禁歌

先皇神武定天下掃蕩妖氛費指謀頑民梗化匿海島  
天子仁恩弗追求窮寇逞兇進京口樓艫填江風颼  
颼江南驚疑江北懼殺人如草積山丘梁將當年一小  
帥忠勇之氣貫斗牛夜深率衆劫賊營橫衝直突敵人  
愁萬號戰艦一夜沒金山更梟賊帥頭逢逢擊鼓唱凱  
歌捷報先來北固樓先皇聞報驚且喜賜之金章鎮  
南州功勳當代推第一神策千古莫與侔寸木不得復  
入海任爾波濤日日流蛟人夜泣蟾蜍暗沙鳥無言自

泳游海不揚波二十年 今皇妙算多遠猷三藩雖係  
先帝封玉食重爲小民憂八旗歸耕遼東地放馬華  
山文德修詎知吳逆不用命耀武邊垂大度劉三藩繼  
之亦蜂起賊臣俱不奉珙球未幾殺伐半海內細柳營  
中列貔貅 王師百萬臨南服血染洞庭芳草秋東南  
財賦甲天下田租屋稅按簿收軍需億萬日不足哀此  
群黎化鬻髀閩中海島復竊發封疆失守當事羞文臣  
無權草寇起擾亂中原卒不休貯糧坐鎮委蔡督左宐  
右有精運籌邊塲夜靜聞笳吹山高樹密啼猿猴江水  
湯湯瀉血淚征人思鄉啓歌喉悲聲淒慘動三峽風號  
浪湧和清謳岳陽樓上聞鞀鼓吁嗟戰士著兜鍪干戈

擾攘七八載吳逆身殞國競絀大兵乘機過劍閣吳宮  
復爲麋鹿遊金馬碧雞氣蕭瑟南風不競悲松楸能攻  
不如善能守用剛不若善用柔亡何三藩皆授首海外  
頑民亦逗遛姚督下令征不臣曩人向化樂悠悠功業  
未成疽背死施公跨海獲封侯世鎮臺灣食萬鍾一望  
大海天地浮中外蕩平民力竭大臣過督小臣偷吏胥  
於中更作奸蒼生衣食嘆不周 聖主重念東南苦重  
開海禁遍遐陬小民間詔舉國狂打鼓造船製羊裘澤  
國蒼茫真縹緲布帆來往不自由 天子生財法最美  
魚糧獲利勝田疇船跨蛟門魚蟹遁網集沙灘起宿鷗  
蘆花瑟瑟冬夜寒海風淒淒漁火幽東南民困 天子

蘇野人何事可獻酬  
皇恩浩蕩澤庶姓  
千秋萬世頌金甌

咏張子房

子房本是人中龍  
一椎欲斃秦皇雄  
君不見大索十日  
命幾殞納履溪橋先學忍

吳門春田歌

日晴氣淑杏花天  
士女嬉遊柳陌喧  
春田一望情何極  
西山似與白雲連  
樹裏時聞睨睨音  
好音逗起春閨心  
綠嫩紅肥增別恨  
漫將心事託瑤琴  
琴聲哀怨最悲涼  
尋春王孫倚道旁  
聞聲低頭渾不語  
春思飄揚蜂蝶狂  
小燕亦知春色好  
飛來飛去斷人腸  
王孫漫對東風立

柳眼參差和露泣  
春波如洗春山明  
春林如霧春雲濕  
春泥帶花入燕巢  
春鳥啄花歌喉澀  
春閨長嘆欲春遊  
春光先到芳草洲  
輕攜紈扇尋芳草  
小呼侍女步隴頭  
王孫一見春閨面  
一朶梨花嬌欲顫  
鞋弓細碾落花塵  
臨風時墮黃金釧  
兩頰芙蓉秋水橫  
隱隱眉端遠黛生  
王孫長揖偏無賴  
細語低聲問卿卿  
春閨拔釵相贈答  
侍女傳言達其情  
他時走馬長安道  
莫忘春田山海盟  
噫嘻悲夫綏狐載  
路爰彼春田士  
悅女慕蒼蒼者  
天惟汝之故  
天曰不知是誰之過

耕牛歌

天生乃粒供人食  
人工不繼用牛工  
牛性馴馴善耕田



炎暑血汗當日中牛德靜以專西成東作自悠然牛力  
大而溥築場納稼功最多農人對此應憐惜無致飲刃  
向人泣牛之筋骨有時衰牛之力兮實可哀牛之體膚  
有時傷牛之德兮不可忘誰知世人不重義牛老終歸  
入屠肆牛兮牛兮莫尤人大德不報類如此

潘層峰疊賜瑤章作此奉答並題其集

前日讀君詩賦陶賦杜情詞真繚繞昨日讀君詩說空  
說明見解多竒妙今日讀君詩談天談地悽愴成別調  
挑燈復披覽滿室光明劍出鞘珠璣故故走盤中欲綴  
蕪詞恐難肖無端忽動不平鳴贈子一言差簡要我悲  
君勿悲我笑君勿笑悲君佳公子文采殊焜耀未作玉

堂客先赴修文召哀哉年少惜哉年少傾一斗向天叫  
哭一聲爲君弔笑君何故辭廊廟笑君何故親耕釣笑  
君何故探雲嶠笑君何故耽吟嘯林泉雖得十分閒那  
知己惹旁人誚愧予放誕久不羈疾痼烟霞莫可療豈  
知人間亦有癡於我不學飛螢能自照剖天心握天竅  
登高山寄遐眺開拓浩蕩之胸襟揮成萬仞峰巒峭跌  
宕翰墨場直教古人見之竚立而徬徨七步未足擬其  
捷幽蘭聊可媿其芳愛君詩讀數行感君意細平章畢  
竟空在何處明在何方嗟乎嗟乎天豈易測地亦難量  
惜君戶小恐不如淵明之酒癖羨子才多或反勝工部  
之詩狂

月牙池歌

君不見杭州西子湖無數青山入畫圖中有亭兮構湖  
心遊人雜還多長吟此中佳景應難盡空晴空雨亦空  
陰我家茸城之西門茸城邊海潮欲吞有池月牙泉水  
冷時看夜落嫦娥影僻徑無人好閉關日長唯聽禽聲  
靜池之北上有佛殿連茅屋禪房鐘鼓梵音幽老僧一  
夢黃梁熟池之旁楊柳桃花插滿塘還有海棠相掩映  
面面朱樓曲曲廊美女鶯聲玉粳粲驚使遊人魂欲散  
可憐爲愛月團圓不道月牙慳一半池之中小亭四面  
臨清風石磴雕闌堪坐臥芙蓉遙映綠波紅更有幽人  
歌一曲急管繁絃音更促夜深靜候月明來把盞傳盃

燒玉燭未幾天清氣爽涼飈生綠鬢紅顏逐隊行一葉  
扁舟雙槳裏採菱唱罷不勝情我年漸老頭漸白倦眼  
昏昏寒症劇世路崎嶇總不平結廬任我求安宅月牙  
雖不及西湖猶堪託足娛晨夕

游仙詞

吁嗟乎我生明年六十弗謂老將至洞賓學仙六十四  
回頭一想苦無聊視天茫茫若長醉思通鬼神世所嫉  
巧奪造化天亦忌不如避地逃蓬山飛瓊雙成共遊戲  
蟠桃一熟三千年笑問阿母能見賜闕來捉得洞賓指  
指石爲金金布地將金散給列仙家直入天門容掉臂

黃耳塚

嗚呼陸家兄弟入洛真可鄙非惟無義亦無耻反顏事  
仇有幾時枉向洛中徒送死獨憐黃耳寄書回一通音  
問空哀哉華亭鶴唳不復聽令人嘆惜天下才文章自  
是世無匹何苦失身空被桎大風折音木不勝情未幾  
黃耳歸亦卒黃耳卒葬江濱江濱一塚常如新可惜黃  
耳畜類未見道徒與不義之士傳千春吁嗟黃耳莫生  
嗔與狗並傳能幾人

江上遇百歲老人歌

世間那得百歲老今日相逢真意表孰料蚩蚩一細氓  
前言往行俱顛倒自稱祝壽謁 聖明御酒淋漓破衲  
襖歸來寂寞臥空山 賜金漫藏幾不保寄食山下頗

碌碌往來崎嶇生煩惱可憐王侯將相都早死獨有老  
子支離偃蹇憔悴不肯速枯槁我聞老者言茫茫昧鴻  
寶古來上壽貴頤養始能精神內固顏美好今看此老  
殊難解須知年齒不足道科頭赤脚心營營謀衣謀食  
愁未了愚昧無知同鹿豕徒老烏足供尋討嗚呼物老  
不死能成精此老反不如畜生

估客樂

估客樂衣輕齒肥滿京洛朝酣歌館醉春風夜擁名姬  
臥高閣日權子母事壟斷遂使生涯益充拓長安要路  
俱上賓五侯七貴咸入幕結駟連騎人爭羨能令顏淵  
原憲見之生愧怍一朝貪心恣不休作估何如作宦優

杖下立可致巨萬片時顛倒誰與仇孰知天心竟難度  
身名兩敗成驚愕相加三木苦曷勝黃金用盡妻孥縛  
典裘賣馬始倖免門庭一旦真蕭索歸來長嘆還自羞  
卻悔當年少斟酌估客估客且莫愁世間那有樂到頭  
義興儲六雅攜令子定伯特來見訪作此贈之

有客有客自義興翩然鼓棹來茸城庭前蘭玉欣載得  
令我見之心胆傾老泉文章世罕匹况有軾轍相縱橫  
開示後學日不倦四方負笈多俊英得登龍門聲價倍  
一鳴遂使聽者驚先生古處希聖賢棲遲蓬室窮殘編  
鹿鳴賓興老始與劉蕢下第誰復憐嗟乎嗟乎我年將  
六十藏書探二酉阿連阿咸俱魏科老朽依然到白首

相對轉相嘆不如且進酒聊爲雞黍供招我金石友高  
論罄交歡傾倒談天口酒闌歌罷月漸高彼蒼造化君  
知否諸君諸君爲我停杯罍胸中浩氣奚堪寫守貞不  
字十年寡世無伯樂悲良馬雷鳴瓦釜黃鐘啞君不見  
儲六雅

空明子詩集卷之四

古婁李節珊先生選

華亭張

榮景桓著

有客

有客論詩酒無花境不開須知花意好何不挈花來

閒吟

相逢一老僧屈膝蒲團坐面壁二十年腹中猶未餓  
蜂向花心摘花忽攢眉弔有人來捕汝蜂回花自笑

君山閒望

躡屐登山頂江流日夜潮小樓閒眺望急雨打芭蕉

七夕

銀河如幻泡烏鵲怎填橋欲探牛郎信乘風問九霄

登城樓晚眺

落日照孤城淒淒遊子情芙蓉江上冷天外鴈鴻聲

試前一日作

歸期應不遠喜氣溢眉端預識還家日兒童帶笑看

偶成

落日空林淡雲間噪晚鴉禪房鐘鼓靜老衲獨煎茶

夏日雜咏

急雨打高樹蕭蕭愁日暮南窓乘醉眠臥讀子虛賦  
人壽能幾何豈同金石固暑氣未全消遙遙嗟行路  
白髮易盈顛彈冠笑王貢可憐烏兔忙聊作琴三弄  
莫受人世容寧爲造物忌夜深蟲聲喧寂寂未能寐

泊舟高淳

一望杳無極白雲銜遠天移舟泊城下萬井起寒烟

桃花潭

送別情何限桃花潭水長誰憐遷謫客一曲斷人腸

清弋江

疾流如發矢徹底見澄清三老堪愁絕難容一艇橫

池陽道中

金城攀陟險僕馬總難支日暮投邨店黃昏月上遲

由宣城至姑孰

下瀨舟行疾山城半有無樓船如蝟集遙指是蕪湖

螃蟹磯

螃蟹何逼肖浮沉在江面橫行直無前疑是長卿變  
望夫磯

日日望夫歸兒夫歸不歸至今雨打石猶似淚沾衣  
慈母磯

倚門猶不足遠望坐青山借問誰家子何時江上還

天門山

放舟天門山山好助詩思屹然峙江濱石壁粘青翠

采石磯

采石傍江天天高散暮烟放歌乘夜月我欲學青蓮

江行望儀真

孤舟望揚子高浪凌天風趁此一帆飽輕霞落晚紅

淮陰釣臺

子陵有釣臺淮陰有釣臺若將兩臺較勲名是禍胎  
早爲少年欺後受老媪戮若能守釣臺無禍亦無福  
光武本故人好賢况汲汲遠引避市朝子陵不可及

平山堂

仰望平山堂高高據蜀岡荷觴還載月俯首憶歐陽

白鷺洲

白鷺分江水振翮若東來回頭望鸚鵡同拱鳳凰臺

京口

金山立江心銀山峙平陸莫怪爲利人忙忙事征逐

玉峰

上有文筆峰下有一線天中間起片雲頃刻迷寒煙

寒山

岳花寂寞開林鳥噪修竹老衲化齋還石洞藏山腹

白雲洞

才過大石洞又臨小石洞此中多靜趣臥聽山鳥唳

龍門石

龍門窈且深誰剗此石碣四顧無人聲古樹掛明月

華山寺

日斜遊客稀泉鳴空谷應鳥雀下庭除山寺一聲磬

天平山

片石轟霄漢石罅懸清溜倒掛一枝花斜映枯藤瘦

虞山麓有見

東山有佳人織作蓬窓下守貞過十年遲遲猶未嫁

齊女墓

齊女旣化蟬何爲又有墓日落柳條黃餘音猶怨慕

劍門

劍門通一豁遙遙幾百步上有往來人仰望若雲霧

山頂望海墩

我登望海墩舉首發清嘯戛然聞長鳴疑是海鶴叫

鵝鴿峰

紅花幾樹紅白鳥幾群白麗景供饞眼獨坐一拳石

范園



撥草尋荒逕來登婉轉橋麥秋成浪日松竹已蕭條

虎丘塔

一塔鎮山巔光明照四邊不愁雲雨暗但恐礙青天

試劍石

道旁一片石石縫如劍劃誰能辨真偽但聞聲嘖嘖

劍池

聞道劍池深泉水餘甘冷汲綆不暫停開門看雙井

千人石

共說千人石日日坐千人可惜千人石惟餘頑石蹲

點頭石

不信茲頑石當年能點頭可憐石上客對此不知羞

崑邑野猪峰

不勞屠伯至匿影沒荆榛嘆爾深深伏空愁肉食人

石上松

巍然一品石上有百尺松松老不知年看看欲化龍

贈友

人苦不自知知亦了無味水熱更添薪枉向湯中沸

斜日

斜日照高閣獨坐生涼風林鳥爭歸巢山色自籠嵒

泊舟半塘

偃息蓬窓下明月入我懷可憐無限恨都向此中埋

月下吟

月下吟良夜苦難辭靜聽天風更冷苦母已幾回雨

薄暮上高岡見者驚稽顙  
弄月更吟詩毋乃疑罔兩  
牽舟過唯亭玉峰多勝景  
引頸望東南嶺雲無片影

見萱花

共道忘憂草如何忘得憂  
見花增浩嘆竟合號添愁

贈儲六雅

江南無文章自古止二陸

此係先生論文語

高論驚四筵下士應

側目

贈樸邨兄

翩翩裘馬客道義有誰論  
南國凋零盡惟餘碩果存

贈金德藩

昔爲講學長今作歸田客  
高岡曾鳳鳴豈容腐鼠嚇

贈俞桷亭

我愛海陵君一代文章伯  
展翅垂天雲南溟在咫尺

贈錢介維

廿載推儒雅風流老更存  
獨憐相國後

先生係故明相公錢龍錫家孫 僅見

此文孫

贈陳含美

合浦含明珠崑山韞良玉  
玉剛珠沉淵佯狂避流俗

贈顧湘九

誰知八十翁少壯俱不若  
讀破萬卷書把酒善諧謔

贈潘層峰

著作盈千箱言言皆玉屑流鶯鼓新簧衆鳥聲自咽

贈懷鏡亭

言瞻茂叔蓮載訪淵明菊書聲出戶外四海一空目

贈儲定伯

係六雅先生令子

文章光燄長隋珠自早售芝蘭生謝庭一枝尤挺秀

贈李節珊

我疑文昌星未必操文柄不然李節珊何為猶聽命

贈汪錦江

錦江係汪舜俞遺腹子母夫人項係孝廉兼一

韻之女子歸不及一載夫即去世守節撫孤最為

得體教子最嚴有九熊畫荻之風

慈母兼嚴父栽培倍苦辛光前應有望玉樹一枝春

贈梅花主人姚子文

梅花枝逾瘦人如梅較秀問君何為爾窮經到白首

戲贈西谿主人

已過花開日重尋舊雨來君知來意否端不為擎盃

問爾花開日採花蜂可來空庭喧瓦雀不許傍瑤臺

問爾花開日游仙蝶可來呆愚遮露井蛛網暗塵埃

問爾花開日狂吟鶯可來隔牆金彈子愁殺小嬰孩

問爾花開日差池燕可來湘簾垂不捲小砌沒蒼苔

問爾花開日高談客可來黃鷄催白日何暇此徘徊

憶得夜宿薇池交界處

對月苦茫茫天高路正長一鞭行色倦轉覺晚風狂  
山木鬱蒼蒼前行畏虎狼誰知風土惡更比虎狼強  
夜靜宿邨莊山荒店亦荒但陳紅米飯一腐未能嘗  
半榻臥空房遙遙夜未央浪游經十載此况倍堪傷  
急急整歸裝經今三十霜獨憐山水好輾轉未能忘

自題

知非纔過去耳順又將逢安得如充耳憑人笑不聰

戲諭大兒兆熊

秦松乳名速來前告汝汝莫笑切弗學汝翁一學便不肖

又諭二兒飛熊

秦蘭乳名亦來前一歲識汝性長大須沉潛庶幾狂作聖

悼亡室吳孺人

明月入簾幕照見床上琴琴弦不復續嗚咽自成吟  
庭內一枝花翩翩自弄影影動不禁風木落秋霜冷

愛山

自無媚世情而有愛山癖倚醉臥翠微巖花盪蒼壁

空明子詩集卷之五  
古婁李節珊先生選  
華亭張  
榮景桓著  
小山看桂追和家嚴東臯先生韻  
閒庭寂寂獨擎杯  
月色侵簾叢桂開  
有酒無肴惜良夜  
誰從江上釣魚來  
共泛尊前鸚鵡杯  
愁腸今日為誰開  
風吹金粟飄行盡  
猶帶餘香入戶來  
戲筆  
向來不信西方教  
今日纔知大士恩  
知慧益人從靜悟  
愧無玉帶鎮山門  
春日

空明子詩集卷之五

古婁李節珊先生選

華亭張

榮景桓著

小山看桂追和家嚴東臯先生韻

閒庭寂寂獨擎杯  
月色侵簾叢桂開  
有酒無肴惜良夜  
誰從江上釣魚來

共泛尊前鸚鵡杯  
愁腸今日為誰開  
風吹金粟飄行盡  
猶帶餘香入戶來

戲筆

向來不信西方教  
今日纔知大士恩  
知慧益人從靜悟  
愧無玉帶鎮山門

春日

臨窗對卷獨高歌竟日無人喚柰何莫訝草堂生寂寞  
春來花鳥慣相過

湖上漫賦

段橋遙接梵王宮南北峰高有路通十里蘇隄桃柳潤  
聖湖渺渺在其中

元墓方丈口號

萬頃晴湖半吐吞 御書高揭客填門老僧不解山人  
意兀自侈談 天語溫

柳枝詞

一望春晴楊柳條條斜掛碧山腰無端美女偷簪鬢  
點綴釵頭著意嬌

蕙蘭

九畹分來有百根氤氳滿室達朝昏諸君可是防香染  
半月無人一到門  
娟娟不與牡丹隣彼是名場勢利人身本煙霞塵外物  
詩筒茗椀合相親  
主人頭白亦竒哉獨愛清香朝暮來一覺晝眠酣午夢  
未容鶯燕兩相猜

牡丹

半空微雨半空晴細認丰姿百媚生借得錦衾連續障  
暫教傾國惑陽城

花下口占

空明子詩集卷之五  
紛紛謀利真勞瘁攘攘求名更苦辛獨有好花看不厭  
莫來我是一仙人

可憐

散材空自望成陰二十年來培養深到底究歸無用物  
可憐辜負看花心

自憐

自憐鬢髻兩蒼蒼閱過吳姬意渺茫誰料姑蘇諸女伴  
柳眉不掃待張郎

壬午歲 南巡歌

翠華端發自神京兵氣全消識太平羽衛不須森扈  
蹕黃童白叟快逢迎

聖主巡行不辟人群黎瞻仰各相親况兼更有 仁恩

沛鼓舞東南百萬民

麗日 宸遊萬象新紛紛柳陌捲香塵霜寒雨凍遲芳  
信無限春光待 一人

越女吳娃窈窕姿宮妝掉漿遠相期不知唱盡凌波曲  
徒使 君王一皺眉

千邨麥隴雪霜侵欲獻無芹自不禁松郡僻居真海角  
可知容易 翠華臨

西湖風月本天然楚楚丰姿絕可憐憶自 天王行幸  
後錦塘花柳獨嬋娟

閒情

年時記得杏花天  
瞥見紅樓貼翠鈿  
不道新來成晤語  
撩人姿態益便娟

幽期待得月華明  
輾轉難禁綺思生  
予美若憐風露冷  
肯教窗外立三更

和陳岱周贈言

一時共訝陳驚座  
分得詩名大小山  
幾度尋芳吟麗句  
漫攜仙侶到花間

閒步花間吐緒餘  
便便知富鄴侯書  
潛夫不解談經術  
何故門多長者車

豈必西山吟詠佳  
后山刻苦亦堪懷  
莫辭一醉春風裏  
坐看苔痕上綠階

相交原貴兩忘心  
百斛清泉品紫琳  
無限風光正堪賞  
新鶯贏得短長吟

題鴨戲贈

生來已解自呼名  
貼水輕飛踏浪平  
敢向鴛鴦誇五色  
始知天意薄浮生

題鶯戲贈

白衣赤掌泛清波  
知是山陰道士鶯  
應欠前生詩酒債  
長鳴昂首戴紅螺

一江

一江楓赤屬深秋  
愧我無端竟白頭  
閱遍衆芳凋謝後  
自憐生計足遨遊



和貧境

東方未曙早鳴雞數點殘鴉魂已迷可惜夜來雷雨後  
池塘芳草濺春泥

山鷓洛下叫天津

群言天外有奇松曾受秦封色最濃誰料不堪供一爨  
夢魂猶自戀高峰

千葉桃被蛀畧無生意作此贈之

花開共道蓬萊種流汁方知榦易空本擬託根瑤島上  
可憐淪落在泥中

戲贈

黃金揮盡未云豪蕭索門庭漸長蒿空掛席帆天上去  
秋江何處不驚濤

暫時

暫時富貴等浮雲解組歸來焉用文李廣夜行曾被辱  
灞亭羞殺故將軍

攜華履仁登虎丘因示同遊諸子

華生年少足遨遊扶我同登萬歲樓堪嘆吳儂真好事  
問他歌舞幾時休

常熟尚湖

子牙曾釣此湖濱不肯終爲東海人何事仲雍甘遜國  
願來蠻地作齊民

鳳來虎丘後山  
風流宛似白家蠻  
面面丰姿盡可攀  
寄語遊人須細訪  
後山應不讓前山

贈不倒翁

目似明兮耳似聰  
歪來倒去似癡聾  
魁梧道是驚人  
物外面虛花裏面空  
大搖大擺過終身  
內裏還虧襯託真  
到底一生難站穩  
勸君莫作不平人

早起獨坐轉覺無聊  
拈上下平各十五韻  
隨意疾書午前脫稿  
詞之不倫未暇計也

四十年來似轉蓬  
炎涼閱盡總歸空  
如今贏得閒窓下

依舊花前對曉風

愁聽燕語欠從容  
怕看前山歷亂松  
明日陰晴猶未卜  
莫教花鳥識行蹤

閒看兒童立水窓  
魚鈎忙整泛晴江  
無端兩度輕投餌  
釣得銀鱗是一雙

扁舟一棹日遲遲  
楊柳空搖斷岸絲  
記得舊時行樂處  
畫船簫鼓載西施

黃鶯白鳥故飛飛  
滄海桑田事已非  
夾岸樓船排鴈翅  
逢逢擊鼓拜天妃

桃花如錦繞村居  
對景臨流坐碧虛  
寄語丈人休動問  
醫牛還許覓方書

終日狂吟任索逋詩腸幸不十分枯錦囊曾笑心肝嘔  
餘剩還堪付酒胡  
一入深山鶯亂啼醉中還覺碧天低崑崙座上欺王母  
要乞雙成作小妻  
天上風流事不諧暫時驚見反稱佳智瓊私語雲英道  
准備潛偷金縷鞵  
要引嫦娥笑口開吳剛利斧奪將來桂花折得連枝贈  
又惹河邊織女猜  
蟾宮光滿爛如銀一曲霓裳按拍新地下散仙應妬殺  
就中不忿是真真  
玉女乘鸞駕彩雲天風吹動六銖裙殷勤爲報飛瓊道

莫使蘭香得與聞  
新月哉生指甲痕洞簫吹徹九天門妙音果肯通情緒  
仙珮留春合斷魂  
要騎黃鶴上天壇宴罷朝回日已殘路遇洞賓堪絕倒  
岳陽三醉莫相瞞  
兩行霧鬢與雲鬟上帝平臨闔闔間檢點仙曹傳玉旨  
姓名已許註蓬山  
莫居人世莫居天駕霧凌霄作半仙拾得彩霞三百片  
一時拋卻洞庭邊  
路入天台景象遙何緣劉阮洞中邀當時怎不同仙去  
又被無端送過橋

空明子詩集卷之五  
遙聞林外鳥交交又聽殘鐘幾度敲一任白雲深鎖洞  
不勞山鬼湯相嘲

鳳凰聲徹碧天高不數霜禽鳴九臯欲覽德輝尋竹實  
笑他小鳥集蓬蒿

可憐日月忽焉過枉使年華若逝波留得此身超劫外  
較量天地孰爲多

臥看明月照丹霞布滿遙空五色花彷彿雲中散天樂  
一時驚動列仙家

五湖四海總茫茫輸卻浮生幾度忙倏長倏消原一樣  
草蟲應莫笑蜩蟬

十朝難得一朝晴霑雨綿綿到五更玉兔朱烏多謝事

不行賞罰阿誰爭

名山幾疊對遙青整頓茶鐺誦道經乍聽鳥聲歸去好

夢魂何異醉初醒

清江涉遍見漁燈我夢爲魚樂不勝是我是魚同一夢

可憐繫日乏長繩

誰不年年覓勝遊憐渠在駕木蘭舟昏昏一覺揚州夢

水色山光總未酬

歸來不覺綠陰深尙有黃鸝送好音一病不禁三十日

閉門枯坐又如今

無邊風月昔曾諳半點禪心似碧潭收拾閒情併逸興

一齊同貯大空函

奚奴爲我捲重簾廣放蟾光照鏡奩但有故交來索醉  
花枝微笑不須拈半襟醉心公夢斷外餘國詩酒遊興  
裁縫窄袖與輕衫打點明年再挂帆鐵笛一聲龍起舞  
任人猜度定仙凡  
泛舟昆承湖  
浪花飛雪噴寒煙一片征蓬泛海天三弄不勞橫玉笛  
恐驚泉下老龍眠

洙涇道中隔句有對

扁舟雙槳弄輕烟恨乏流鶯轉柳邊斜日一輪籠遠浦  
幸逢飛絮點窗前

學仙首尾有對

蒲團紙帳坐空禪枉送光陰幾十年覓得長生真秘訣  
玉冠朱履拜金僊

叅道中句有對

五千言裏識真詮白虎青龍任轉旋玉兔金烏隨起伏  
鳶魚原不落空禪

黃耳塚

黃耳當年忠義全至今得墓碧江邊陸家兄弟墳何在  
不及巍然一塚傳

附八言絕句

遣妓

聽他百媚千嬌軟語逗我三迴九轉柔腸豈有吸露餐

空明子詩集卷之五  
松仙侶猶憐調朱弄粉名娼  
附九言絕句

苦雨

人生一年佳况苦無多可惜連朝風雨暗消磨那得羲  
輪爲我早扶出典衣沽酒對景且高歌

獨坐

無朝無夜黃霧捲飛煙天地三炷爲爾總茫然終日掩  
關息交且獨坐算來不如吾與我周旋

空明子詩集卷之六

古婁李節珊先生選

華亭張

榮景桓著

春日

萬葉齊舒綠春風猶帶寒空庭生碧草虛室放幽蘭聽  
鳥頻凝竚看花獨倚欄閒吟方得句又是日將殘

九日

勝友如雲集登樓破俗情題糕茶已熟賞菊酒宜清柳  
色因秋老蓉花得水明不堪吹帽落寄跡等浮萍

秋杪卽事

秋水何澄澈自忘塵世心獨攜一壺酒且抱無絃琴徑  
僻多清致林幽少雜禽黃花看不厭白髮恐相侵

晚泊申江

向晚狂風發空江浪接天幾枝殘柳外千點亂帆懸雨  
潤窗邊紙雲籠樹裏煙年來寒症劇對此便淒然

朝發

但見水齧岸遙聽風入松孤舟人獨倚雙槳影偏重遠  
艇浮如鴨行雲矯若龍故園秋色好朝晚醉芙蓉

涇縣道中遇雨

馬首疑無路孤雲自去來峰形天際合瀑響耳邊迴方  
懼蛟龍起何堪風雨催前行莫相失虎穿在山隈

爲四兄賦得孤鴈

何處來孤鴈清宵度玉蟾哀鳴徹天表寒影拂山尖翅

帶風霜老愁從夜雨添頻年蕭瑟甚不分看鷓鷯

日本五月菊步韻

海舶攜金菊天中漏早秋風炎綠土帶香冷際窓浮端  
合調冰碗無須問玉甌紅榴堪掩映雲淡日悠悠

春風樓小飲

招友登樓飲憑欄眼界新客來惟慮少酒到莫辭頻瀟  
洒見風致優游露本真月光爭入座花影亂搖人

雜興

我已愁無盡誰能解我愁鶯花三月老書劍半生羞鴻  
鴈空中落煙霞筆底收此身多偃蹇洒淚向殘秋

過海會寺追和家君東臯先生韻

空明子言集卷之六  
二  
我來海會寺澹日已流西野刹鐘聲遠荒村花逕迷塔  
輝白玉石座燦紫金泥握手談禪久高僧過虎溪

舟中

蒹葭搖落後江水有寒威雙槳翻新浪孤帆趁夕暉漁  
翁能適興沙鳥自忘機舉目堪心賞無嗟與世違

落照

落照千村靜悠悠別思生游魚貪浪穩飛鳥趁風平蕩  
槳蘭舟捷揚帆桂棹輕漁歌遙入耳冥晦不勝情

尋春

春意欲生動草木發榮華村荒雞犬靜逕僻海天賒水  
轉魚吞荇風迴鳥踏花晚山多靉靄杯酒酌流霞

泛舟泗濱

輕舟過泗水春色破寒圍楊柳新垂綠桃花近賜緋風  
狂遲鳥翼雨細入人衣向晚添蕭索雲深暗釣磯

賦得桃花亂落如紅雨句

似雨還非雨如花不是花露桃開曉日春色泛晴霞綠  
帳荒山蔽紅濤野寺遮朦朧零落後疑泛武陵槎

海塘晚眺卽事

海水不可測漁舟次第還風狂凌雪浪波壯撼金山鵬  
怒翱翔穩鯤遊出沒閒我心別有會絕意夢人寰  
霧氣侵人骨煙波興欲狂雲間明月現海底夜珠藏巨  
浪吞山谷驚濤打石塘我生何所託愁思正茫茫



赤浪塞天地金山水上孤半帆懸落照一鳥下平蕪  
疎柳寒煙散荒塘細草枯乘風歸去晚我欲倩人扶

九峰道中

扁舟聊破浪端發擇良辰草色藍於翠晴光白似琅  
兩山夾岸老千樹入春新爲見楊花落無端惆悵人

宿石埭村庄

行踪靡有定薄暮到村庄雞黍堪供客林泉可納涼  
方言真不解犬吠亦多狂獨向匡牀坐遙遙夜未央

美人汲水

花逕深深見池塘好女來雨餘梅水足岸潤鏡奩開  
汲罷香浮袂攜來紅暈腮徘徊怕沾濕繡襪暗生埃

和廣陵客橫潭步月原韻

閉戶真成嬾觀心在六時多因衰病久莫怪見賓遲  
不飲兼除酒無題可作詩夢勞潭底月何處寄相思  
佳客翩然至詩中見畫圖醉歸吟月徑引我入蓬壺  
堪嘆篇章好空悲歲月徂時來應有待切莫話乘桴

上已

修禊名猶在臨風弔古人好春容易過經眼倍相親  
細草迎來路籜花落去津新鶯撩我恨百轉更傷神

廣富林

日落九峰平煙波傍晚生好山容我看小艇任君橫  
雲掩一輪瘦風吹兩袖輕短章聊寄興檢點近初更

舟行卽景

草色上遙空舟行面面風一江初弄碧萬點已流紅  
樵唱來青障漁歌出翠叢獨憐衡泌客頭白老墻東

山中

千松夾古道一塔對高峰淒絕誰家鶴敲殘何處鐘  
未容紅霧鎖只合白雲封爲採山中藥溪頭見鹿踪

渡黃浦

欲知申浦險但看海潮雄一葉如飄絮孤帆若轉蓬  
浪隨千尺長運信百年通何必驚肝胆乘流負大風

筠溪故里

我愛筠溪好筠溪得自如種松三丈外遺宅百年餘  
咬

脆聊供笋烹鮮待釣魚自斟還自酌高臥一牀書

展祖墓

我愛筠溪好筠溪世澤長故居仍翼翼永宅益蒼蒼  
種德欽無媿詒謀羨允臧子孫誰繼武式穀莫相忘

泊舟秦山

舟泊秦山麓輕飄楊柳風鳥啼清磬外人語落花中  
絕巘搖殘照窮簷賦大東何時重到此把酒問年豐

本句廻文

煙捲暮愁牽牽愁暮捲煙天遙接遠樹樹遠接遙天  
眠短驚殘夢夢殘驚短眠前春憶歲晚晚歲憶春前

當句有對

白石瀉紅泉清風颺翠煙上方通下院草閣對花田小  
圃添微雨遙岑暗遠天自嗟還自笑前日憶前年

上邑神廟東園

為訪東園勝來遊路欲迷攜筇登翠嶠躡屐上丹梯深  
洞藏春小垂虹壓澗低名花開正好桃李別成谿

訪家蓬園叔因備悉年老家貧作此志感

司馬休官後

任雲南開化府同知康熙初年解任歸里

俄驚五十年半生餘

畫卷垂暮愛詩篇

叔工畫善詩今年近九十矣

屋老頻傾瓦厨荒屢

絕煙清風存兩袖回首一凄然

樸村大兄屢承見詢作此酬之

我問徵君好徵君且莫愁一經傳註疏

奉纂修書經

三載

定遲留

大約三年可以告成

故里休回首他鄉譬浪遊何時鷹

特眷拜手展嘉謀

伊章五姪閉門教子一別兩載今春過舍予又他

往作此寄意

力田兼教子為善日孜孜值爾拏舟日當予鼓棹時三

秋成久別一水動相思寄語棲遲客來看述祖詩

予是時作

述祖德詩一百韻

舟過丹陽城霞閣

閣中供關夫子神像

舟過城霞閣飛丹映夕曛流芳垂百世遺恨在三分吳

魏今何有英靈遠更聞獨憐江上水不許住行雲

雨花臺酒樓清唱

空明子詩集卷之六  
六  
縱步長千里登臺話雨花講經人已去沽酒與偏賒六  
代繁華散孤村鳥雀譁醉聽落照外一曲度紅牙

石帆山

石骨千條紫江心一柱紅僧閑真似鶴山秃漸成童寄  
迹興亡裏潛身波浪中欲將無限恨流盡海潮東

燕子磯夜坐

忽驚玄鳥集鼓翼若飛鳴一點綠江岸千秋拱石城笛  
吹天半月波泛水中鯨寄語烏衣巷翩翩倍有情

金山小憩

潤州開勝域浮玉金山一  
名浮玉插江心春色分南北潮音亘  
古今龍吟明月爽鼉吼碧天陰莫向留雲亭  
名坐罡風吹

不禁

自怡

靜觀天地趣獨得古人心童冠有時樂風流何處尋綠  
陰常掩戶明月偶開襟知己真難遇吟成聊自吟

輓亡室吳孺人

憶昔于歸日深閨每自憐卻愁身善病孺人向有  
胸腹之疾更望  
我長年子幼患瘵疾  
幾死者再豈料同諧老何期嘆逝川潘牀應

不寐孤月照窓邊

長子纔三歲擎拳蕙帳前問渠娘去處卻說母昇僊廿  
載憂勤意千秋聚散緣達生誰似我哀慟也徒然

話別無多語回思倍惘然兩兒須保護妾萬  
氏出長女好周

旋徐氏出 叅透三乘上幾超一着先優游歸大化麗日散

晴煙

一病嗟亡有俄驚六十年才甘居衆後死幸在夫前蘭

桂爭標異棠梨並鬪妍是時棠梨蘭桂一日並放散花僊女下同上

大羅天

晨起

乍聽晨鐘起塵心一豁然挑燈花弄影啓戶月張弦墨  
瀋流玄液茶香散紫煙雞鳴分義利努力做前賢

贈華妾

華妾歸我九年纏綿疾病楚楚可憐者八載於  
茲矣不意仲春忽報有宜男之信痼疾亦一旦

頓捐今分婉在卽美璋有望爲作此詩一以志

感一以志喜

屈指桃夭候經今已九年于歸時在己丑  
上巳前一日曉烟籠遠浦

晴日麗遙天伴我燈常盡憐伊病不痊宜男無復望絕

意禮金僊

豈料今春仲依然好夢來熊羆應叶兆蘭玉已含胎宿  
疾欣全愈新歡可預猜待予得子後看爾笑顏開

空明子詩集卷之七

古婁李節珊先生選

華亭張

榮景桓著

雨窓和 家嚴東臯公韻

臨軒把卷獨吟哦  
品水煎茶看薜蘿  
靠檻花枝啼鳥少  
傍簷窓紙晚風多  
竹邊遙憶三江雪  
松畔難窺九點螺  
終日廉纖愁不斷  
浮雲何事去如波

九日偕芳苑二兄暨齊軾松友兩弟登泉覽樓  
鐘聲頻扣梵宮幽  
兄弟同登一覽樓  
三泖蒼茫來返照  
九峰碧瘦入殘秋  
將開黃菊疎籬畔  
已醉丹楓野渡頭  
此際憑欄多感慨  
湯湯四望白雲浮

題迎暉閣

一望平原芳草連  
雨餘惟覺野花鮮  
檢書酌酒堪忘睡  
啜茗焚香不記年  
茅舍竹籬含夕景  
栖鴉流水澹寒烟  
東風忽又吹肥綠  
愁見垂楊拂畫船

古沐堂小憩

亂蟬高噪夕陽天  
閒步招提思渺然  
幽壑飛泉懸瀑布  
高峰聳翠起晴煙  
梵音自爾無多句  
心印從來不著邊  
獨向空王一稽首  
塵緣消盡欲逃禪

九日筠溪偶步同盛良哉世執

西風起處白雲流  
偶爾登高樂事稠  
燕去鴈來時序變  
柑黃橘綠草堂幽  
星飛桐葉漫天暗  
雪捲蘆花著地愁  
莫道荒郊難選勝  
采菱溪畔有清謳

至日泊吳淞江口

晚向吳淞江口泊  
此身寄跡恨無端  
草枯木落禽聲變  
風急天高鴈字寬  
薄醉非關元酒淡  
重裘猶覺曉霜寒  
驚聞又復逢長至  
歲月蹉跎過隙看

落梅

東君自覺逢春苦  
花意何曾戀故人  
幾處飄零聞遠笛  
一番搖落逐輕塵  
悠悠點額嬋娟去  
脉脉傷情風雨頻  
聞道蘇隄桃柳暗  
不須對此怨芳辰

憶西湖

春色爭鋪芳草洲  
西陵松韻不勝愁  
別開天地湖光豔  
更有樓臺山徑幽  
雙塔鐘鈴傳梵語  
六橋桃柳自風流

人從峰泖遙相憶何日清歌結勝遊  
六翮將自風流  
浦行  
漲水連天勢欲平荒雞唱曉客心驚  
半窓掩映孤村遠  
雙槳翩翩一葉輕  
綠髮朱顏愁裏改  
白衣蒼狗望中生  
湯裁短句酬吾友  
不盡年來契濶情  
旭日初昇潮正平  
扁舟曉渡宿鷗驚  
煙波浩渺漁灘小  
雲樹蒼茫鳥翮輕  
世事總隨江水逝  
雄心猶逐浪花生  
雙睂何事頻頻鎖  
寥落春申故友情  
草枯木落白雲平  
風打棲鴉樹上驚  
小艇湯隨流水去  
敝裘應爲曉寒輕  
煙迷澤國三江遠  
鬢染霜華一夜生  
人世何須盡惆悵  
故園松菊最關情

蘆花遠接浪花平  
噴薄黃沙野鷺驚  
堤柳半凋江岸濶  
寒鴉高噪午風輕  
關心水調漁舟起  
過眼荒烟村落生  
回首十年成往事  
黑貂裘敝不勝情  
烟霧蒼茫竹木平  
鴈鴻嘹唳轉相驚  
白雲渺渺和天遠  
紅葉飄飄墜地輕  
應有霜華侵鬢長  
不知黃菊爲誰生  
溪流一曲環村屋  
漁火江鄉日暮情

望夜郊行

無心策杖水雲亭  
茅屋蕭條對淺汀  
幾點漁舟兩岸柳  
一輪明月數行星  
山空樹補疑無迹  
浪轉風生若有靈  
正擬春田閒品酒  
長吟豈羨五侯鯖  
咏柳步符匡世韻



撩風拂雨影參差客裏銷魂莫自持垂帶漸看舒眼日  
飛花卻想送春時無情有恨人相隔欲折仍攀馬正遲  
記否去年明月夜爲君高唱數行詩

松毛塲晚泊

輕舸晚泊自從容徙倚橋邊聽梵鐘明月不妨堤柳鎖  
青山疑有暮雲封閒情每向林中覓麗句多從容裏逢  
惆悵泉聲似嗚咽舟人遙指翠峰重

放生池閔眺

曲折闌干婉轉橋一簾晴雪泛輕舸荷珠顆顆拋明鏡  
柳帶垂垂拂盡橈飛鳥性馴隨飲啄游魚機活任逍遙  
惠莊逸事堪重省濠濮於今已寂寥

過西泠橋

錦隄行徧到西泠滿目蕭條悵翠屏樵擔何曾耽鳥語  
釣船空自帶魚腥酒澆蘇小難尋墓詩弔林逋尙有亭  
宿霧乍消山色美娉婷少女睡初醒

蘇堤晚望

傳聞盡說西湖好纔到蘇堤意惘然芳草偏藏山窈窕  
晴波遙漾月嬋娟六橋桃柳今重植前代風流已可憐  
把酒高歌君莫笑何年重上泛湖船

法相寺禮定光古佛

古佛常留不壞身端然法座自相親珠林但少談禪侶  
竹閣猶傳畫壁人嶺畔風濤皆栝栢門前車馬雜荆榛

螽斯繁衍紛紛禱天上何曾斬石麟  
謁于忠肅墓

當年北狩埋轅日天地鍾靈一老成  
豈爲新君忘故主  
獨持大義壓群英國恩甘殉無由避  
臣罪當誅莫與爭  
身後謗消崇祀典此心原不愧神明

同吳赤霞坐雲林寺冷泉亭

開襟同坐冷泉亭山木陰深蔽日星  
香刹至今餘勝賞  
鷺峰何代著竒靈清風拂拂林間過  
流水潺潺枕上聽  
濯足釣魚皆可意隨波但少一蜻蜓

觀五色魚

一泓泉水逼階除聞道龍王卽此居  
廢寺不煩人扣戶

老僧惟指水成渠怡情偶踏三天竺  
寓目閒看五色魚  
四壁丹青須愛護莫教歲久作丘墟

武穆王故宅題孝娥井

弔古閒來發浩歌斷碑難認費摩娑  
銀瓶殉節悲無限  
金井埋香喚柰何一代孝思餘故宅  
千秋靈爽寄清波  
肅瞻遺像徘徊立慚愧鬚眉感慨多

上吳山第一峰

獨立吳山頂上望江湖雙鎖此中央  
直疑兩腋俱生翼  
未到三秋已覺霜建國錢塘猶草莽  
射潮鐵箭亦荒唐  
荷花桂子今何在一片寒潭付渺茫

自湖上歸白龍潭觀劇

蘭棹初回到水樓笙歌沸徹海天秋平看殿閣玲瓏出  
直訝湖山汗漫遊真面目從何處覓假衣冠向此中求  
不須更憶西泠路懶散何曾計去留

閒窓呈薇尹宗兄

積雨江城返棹初庭空草長子雲居安排小榻窺青障  
整理閒窓坐碧虛過竹風輕隨蛺蝶隔簾香細認芙蕖  
世情一似羊腸險看作浮雲任卷舒

堯元國主蒙立真伯在人耳中作遊仙詩

曾向堯元國裏來耳中消息可相猜峰巒窈窕和煙鎖  
宮殿輝煌傍水開露濕花低歌雪竇曉晴鳳舞上瑤臺  
仙曹主籙休羈絆真伯堪同倒玉杯

賞紫牡丹時暴雨損花

閒看蜂蝶度花枝濃豔爭開信未遲顧盼曾勞妃子賜  
色香應自魏家移紅粧盡檻盈盈立錦帳春風小小垂  
惱殺輕雷驚紫玉不堪愁緒罄餘卮

白公塘曉發

飛絮隨風逐馬蹄白公塘外草萋萋夢回鶯眼窺人疾  
臥對山光入檻低黯淡菜花黃半褪朦朧楊柳綠初齊  
蘭橈莫漫催歸去一道笙歌在水西

過吳門

楊柳飛花著地輕片帆曉渡闔閭城金鶯不管閒愁結  
水荇徒牽別恨生雲暗遠山看未見烟籠野寺畫難成

第三泉畔頻回首想殺斜陽笛一聲

憶得青岳僧欲留花媚熱官句湯賦

禊事如今儘可刪蘭亭佳會喜緣慳僧貪計巧應趨熱  
官好錢多未放閒笑我有山也解看任他曲水亦難攀  
近來識破炎涼態學得仙家一味頑

過青溪

路入青溪午夢耽愛渠晴影落空潭孤城對嶺看螺黛  
小築臨流供石龕進酒徵歌君莫笑探竒選勝我常貪  
豔陽天氣多疎嬾詩興孱於小國男

次世修舊味原韻八首之四

四圍翠色繞書龕中有清冷百尺潭獨癖溪山推禹錫

願尋蘭菊訪羅含笛吹遠浦雲初隔鳥入深林楓乍酣  
莫怪形神近昏憒思量已自老癡憨

半簾花影日相半笑我年來老更狂擬得古詩追漢魏  
幸無陋習雜齊梁雲歸竹徑孤村暗夢入槐安兩鬢蒼  
貧也何妨還自守不從江氏乞檳榔

斷虹十里憶吳江載得嬋娟伴綺窓丹嶂遠浮山裏寺  
綠陰低覆柳邊艘春風蕩漾琴心老夜月蒼茫劍影雙  
我舌尚存猶可試壯懷鬱鬱未能降

非因三徑怕荒蕪不羨長安風景殊小苑開罇空泛綠  
閒窓點易湯研朱獨邀夜月堪供賞早納秋糧免索逋  
成敗真同碁一局幾回嘆息老潛夫

岫雲堂詩賦贈王朗菴

鳳鸞借得半枝棲  
泖月峰雲藉品題  
九點已容松入夢  
一官仍似絮沾泥  
庭邊人靜宜招鶴  
檻外煙寒待舞雞  
獨對此君吟不倦  
琴堂較勝浣花溪  
雲本無心岫自閒  
每從冰署望煙鬟  
吟邊對客頻傾倒  
花底攜樽任往還  
曉日半懸呈五色  
晚霞遙映憶三山  
何時得遂聯床願  
示我文章並馬班

破帽次趙柳介韻

形容憔悴病離披  
頂戴多年勢莫支  
髮短要他遮秃鬢  
頭風藉爾敵良醫  
不須神武門前挂  
何用龍山臺上吹  
歌側任憑堪笑傲  
夜燈長伴讀新詩

賦得雨中春樹萬人家

帝城佳氣最無邊  
遙聽鶯聲奏管絃  
萬井烟深籠柳陌  
千村雨細潤桑田  
農夫望歲愁今日  
唐主行春憶往年  
西眺秦關一百二  
可憐猶是舊山川

春來

春來無夜不翻雲  
凍柳欺梅太從衡  
瑤粉輕飄沾鶴鬢  
玉英亂灑伴書聲  
花朝瘦損愁遲日  
風信披猖怕五更  
鈴索錦幡成悵恨  
舊年臘月最清明

春經高陽故居

故居經處類山陽  
物在人亡合斷腸  
虛室空牀憐落月  
嬌紅嫩紫怨飛霜  
綠溪新柳搖殘雪  
夾岸疎篁拂短牆

幾點寒鴉鳴屋角銷魂此際見滄桑

山行卽事

春到春分魂欲銷遊人能惜馬蹄驕無邊淑景來花氣  
一路風光在柳條白練沙明青草細綠隄橋斷碧天遙  
日斜漁唱中流起倍覺溪山入眼嬌

渡江憇金山

海天一柱夙稱雄梵刹巍峩水色中明月夜隨江岸白  
晴霞曉映日輪紅南來雪擁千層浪北去煙開萬里風  
卽此塵心堪頓滌何須辛苦覓崆峒

西施褒姒楊妃三種菊步韻

幾回絕色鬪新粧傳得芳名菊有香異代各垂亡國淚

一時同傲晚秋霜自甘沒世埋枳棘不羨來生近帝王  
回首上林何處是東籬醉賞興方長

寄懷樸村大兄

渾金璞玉蘊茅廬抱負竒才意自如握管每傷秋老日  
銜盃常到夜深餘客星悵望銀河濶梁月頻思砧杵疎  
問訊虬江舊親串何年得上萬言書

燈下論文堪絕倒對君偏喜醉金卮胸中錦繡藏經術  
筆底煙雲慰夢思竒想天開頤共解大才晚就運應遲  
上林饒有花千樹可任黃鸝借一枝

君山弔古

春申古墓蘚痕封山色蒼茫氣鬱葱鷗鷺共浮江渚水

虬龍時吼海天風當年盜國身何處此日歸泉夢亦空  
無限荒涼增慨嘆亂蟬嘶出綠陰中

贈曉峰禪師

酒癖書淫自不禁何時訪道到珠林雲根逗水波紋細  
月影侵廊花意深半榻十年叅上乘化城一喻醒塵心  
西來大旨應非遠試向鐘聲起處尋

和旅山和尚窮詩

落落知交久諱窮閭房高臥味無窮咏歌獨得何求富  
義命相安自固窮詩酒流連真足樂溪山采釣可忘窮  
但能悟徹窮通理悟徹窮通便不窮

七夕步芳苑二兄韻

露濕花枝不耐秋高低螢火撲簾鈎金風乍入塵襟爽  
銀漢高橫月影浮桐葉欲飛猶戀樹藕花閒墜忽驚鷗  
年來抱病申江臥乞巧樓前特地愁

登采石望大江

凭高一似鏡奩開松栢青蒼入座來眼底絕塵除障礙  
胸中無物可刪裁江山自足登臨趣筆墨慚非橫溢才  
卽此便堪朝絳節更於何處覓蓬萊

述懷步齊軾七弟韻

落落東南一散人飄然杖履任天真有生更學無生訣  
畏死還求不死因茗葉嚼來甘似蔗松花收得細如塵  
莫隨駒影空馳逐且作溪山嬾惰民

登莫釐峰望震澤

五湖占得最高峰水色山光較不同正喜乍晴朝氣爽  
還疑欲雨暮煙籠驚心虎豹蹲荒草傾耳虬龍吼大風  
端擬結茅來住靜肯教踪跡類飛蓬

洞庭山微香閣夜坐

莫言世外無真樂臥聽鐘聲夜半撞四面翠峰皆入畫  
一簾白雪獨當窗泉迺月色流金鏡風打松花撲玉缸  
忽慮夜深蛟起舞乘潮東去卽三江

和松坪東洋夏菊原韻

隨意扁舟到上方喧傳異種出扶桑結根海島經千里  
移植山塘近十霜佳色不殊籬落致幽芬欲逼芰荷香

吳儂好事真竒絕那惜狂歌載酒忙

賀朱辛輿五十入泮十首之一

疑怪燈花昨夜凝一回匡坐一晨興豈知滄海終能到  
不料青天也可登小有園林荒寂寂暫時門戶熱騰騰  
由他阿弟官州判若較輸贏未必勝

寄姚殿颺

齋寒逕僻親賓少瓶供殘英三兩枝  
鷲鳥尋香梅似雪代花憎雨淚如絲  
四愁未擬多緣病一字堪師妙在癡  
更藉千杯驅累藥八行書就報君知

元夕持齋

良宵三五鼓聲頻一點燈光氣象新  
陋巷豈無人似玉



空山子言集卷之七  
二  
遙天虛挂月如銀梅花已放真成瘦柳眼將舒怯未勻  
慚愧平生詩酒興何緣辜負可憐春

戲柬朱辛輿

君看異鳥豈輕鳴引吭長鳴聽者驚恰似故人初得意  
便於新歲不徒行三年磨礪鋒芒出一夜風雷頭角成  
自入雲霄難覲面由來魯國重諸生

咏人面桃

花容人面兩難描崔護當年魂欲銷移傍幽居原自媚  
不教木客近乎妖漁樵日暮歌偏遠雞犬春風韻更遙  
雖遜玄都觀裏樹曾陪士女度良宵

答贈范春江

當今風雅足吾師何事棲遲谷水湄共道機雲堪伯仲  
誰云嵇阮僅偏裨半生別恨秋濤洗一種閒愁春草知  
自笑年來得三樂看花對月讀君詩

晴窓對梅花

春回嫩綠上莓苔梅映晴窓亦快哉十里未聞連夜發  
一枝先向此中開花搖素影黃金几酒引寒香白玉杯  
或恐前身是飛燕好裝七寶避風臺

閒愁

避跡蓬蒿垂十秋春風獵獵動閒愁飄零誰復憐丁鶴  
淹雅人爭識鄭牛不羨八叉題赤管獨攜一笠挂丹丘  
儒冠曾惹無窮恨望眼空穿烏白頭

憶趙虎文

緣淺難消一段春半煙半雨半飛塵經時對卷愁無酒  
盡日垂簾患有身花瓣暗飄鶯拾得雷痕潛濕燕相親  
他年曾訪蘇門隱長聽鸞聲學葆真

戲贈

烟鎖花溪一片春琅玕且喜緊爲隣醉邀仙客拋銀海  
笑指妖童號玉人百晦采蘭圍繡幄四香遮柳避芳塵  
可憐婉孌清揚子但少烏龍臥錦茵

次韻酬友人都門湯興之作

丘園坐老愧無能千里相思惠百朋君走名場忙似鹿  
我依初地寂於僧吟哦詎可違紅友滋味何如對漆燈

莫道長安難託跡故鄉五月水雲蒸

郊外閑吟

柳市陰深茅舍遙牧童吹徹一聲簫千層麥浪浮春色  
萬點風花捲暮潮鶯近垂楊何處轉魂迷芳草不堪招  
荒雞旁午聲愁絕滿眼松筠鎖寂寥

飲翁馭臣齋賦謝

殘梅落盡杏初紅名飲何愁渴酒龍婪尾不辭傾竹葉  
烏皮奚啻列駝峰醉心拚學山公載飽德深慚段相供  
見跋莫疑更漏盡隔花纔報二更鐘

同含美濂溪觀劇畢因赴來英之約湯賦

誰將一曲奏雲隈點綴層臺錦繡堆絳樹恰隨簫鼓歇

霓裳還傍管絃來因知身世同浮泡豈獨優伶類劫灰  
爛醉故人君莫笑遠山不見日西頽

卽事

銷盡蘭膏夜若何菜花陌上湯經過泥深不止難穿屐  
雨急還防倒捲波隔浦漁舟遮露柳傍村鬼火帶烟蘿  
危橋仄徑俱行遍惱殺東風撲面多

小院懷趙晉籓夏善長

香擁紅芳小院春正因濃豔更愁人十千酒債朱提少  
廿四花風玄液頻蛺蝶未交憐粉膩螭螭忙採怕家貧  
如何不負盃鸚鵡紅燭留髡醉一旬

牡丹

坐對名花笑語頻恨無佳句贈真真四香閣上簫聲咽  
百寶欄前月色新李氏酥煎看冶豔舒家繡障隔芳塵  
可憐不遇程修已誰復陳詩獻紫宸  
珊瑚爲架玉爲牀收拾春光上畫堂紅粉三千堪作隊  
金釵十二列成行杯浮瓊液賓朋醉膾縷銀絲七箸香  
多少傾城供一笑可憐蜂蝶亦飛揚

舟行雜感

銀浪真堪駕鐵舟吳歛一曲破悶愁錦帆半挂三江遠  
畫檻平臨九點收靄靄彩雲圍日脚霏霏紅霧散風頭  
何須憑弔千秋事滿眼繁華亦故丘  
任他蘭漿盪輕舟嫩柳新蒲動暮愁日色不多看漸去

春光無幾恨難收誰家獻賦干雲際有客甘貧臥隴頭  
細數古來名利子未堪宿草徧荒丘

乙酉金陵歸家作

打掃愁城另立場桂花已謝菊花香小橋流水人無恙  
矮屋疎籬草自芳酒盞只宜供嘯傲筆床無復記荒唐  
堪嗟歲事成寥落且與村農細酌量

病起有懷寄黃劍威

爲愛晴和春暮天強扶衰疾到窓前花梢蝶翅高還下  
樹底鶯聲巧更圓若個炎陰真可惜怎生消遣得周全  
諸君約畧多同病打破愁城在酒邊

擇吉壤卜墓族伯湯賦

遙想當年生計貧桐棺冷落厝江濱寒風夜伴蘆花雪  
麗日朝愁陌上塵朽骨可憐無祀鬼殘骸得遇太和春  
同心幸藉諸兄弟經理佳城得展親

又雨

才晴又雨近春分剪縷縈絲織翠裙拂岸殘梅花冷落  
侵階細草葉繽紛煙橫遠樹迷雲竇風鏢方塘感篔簹紋  
金管日長消不得醉眠可要覓桐君

歸棹寄顧湘九

流鶯飄泊竹初芽開到桃花又李花雙槳波翻溪北轉  
片帆春挂日西斜萋萋小圃添新綠淡淡遙山映暮霞  
高唱未能消白髮只須得酒便爲家

窓前山茶

紫燕黃蜂隨意開  
小齋春暖發山茶  
全低綠錦千層碎  
半捲紅綾一道斜  
名亞寶珠雕赤玉  
色同瑪瑙映朱霞  
誰將鶴頂丹砂染  
留伴書窓度月華

春日卽事寄湘芷外史

春色朦朧錦繡遮  
嬌鶯乳燕度芳華  
晚晴曳杖尋桃葉  
朝霽提壺問柳花  
紅粉有情迷晉索  
青袍無計避香車  
年來不覺登臨倦  
愁對西山落照斜  
風回晴日獻良辰  
路轉斜橋太媚人  
夾岸桃花紅雨嫩  
繞堤楊柳綠煙新  
游絲不繫春光住  
飛鳥偏啼暮靄頻  
惆悵無端數行淚  
道旁暗洒濕香塵

賦得梅花落地魚鱗薄次沈瑤田韻

蕭疎白髮已盈顛  
忍見瓊英別玉川  
香雪飄飄愁晚照  
蒼苔點點濕春煙  
風迴素影誰能似  
甲邨神魚此地偏  
我欲醉眠花底月  
孤山疑在釣臺邊

夜坐苦雨憶董瞻吧

祝晴日日望雲開  
好倩蟾光到鏡臺  
霓羽雖無白雪和  
金波堪照玉山頽  
挑燈覓影生竒鬼  
煮茗添酥响蟄雷  
欲得故人來入夢  
柰他寒雨滴蒼苔

午睡憶奕山十一弟

臥看花影下層臺  
窈窕文窓次第開  
紅友中人殊不惡  
青鏤恕我暫教回  
爐烹雀舌聽泉沸  
睡帶蘭香入夢來

消得日長琴一曲好從爨底覓桐材

奕山弟工於琴故云

戲柬朱秉士

禁烟時節雨風遙偷隙尋芳到草橋  
綠暗湖邊惟柳嫩  
紅燒天半有桃夭  
醉心不獨鶯聲好  
觸目偏驚山色嬌  
佳景關情易惆悵  
習池何日遠相招

龍燈

燭龍擎出慶華年  
首尾驚看錦障前  
大海原知難變化  
元宵暫許一周旋  
爪牙拏攫人爭沸  
鱗甲飛騰火欲然  
安得紅雲高捧著  
鰲山頂畔夜光連

誰遣神龍若木東  
爭看天矯舞春風  
柔條作體無堅骨  
烈燄薰心太熱中  
幾處朱門歌徹曉  
通宵錦陌月當空  
燈殘頭角嗟零落  
枵腹惟堪付祝融

共說錢塘一火龍  
何來元夕鬪燈紅  
燒殘蠟炬光華滿  
迺入侯家氣象雄  
蒙質但憑紙作俑  
揚威全賴篋爲功  
可憐得意無多日  
魂斷蕭蕭暮雨中

天門曾侍紫雲紅  
又向天街習火攻  
入市競誇光接漢  
徹宵爭詫氣如虹  
生憎矯矯純陽物  
變作星星百足蟲  
弄破紙糊誰復顧  
不如竹馬跨兒童

上元佳節月輪圓  
龍作華燈五彩全  
獅子減威應退步  
鰲魚失色敢爭先  
鬚髯但恐常垂地  
頭角惟愁欲礙天  
誰料炎炎消歇後  
枯柴敗柳得同然

龍身節節好盤旋  
首似牛形尾向天  
豈解與雲併作霧

但知覓燭與求錢朔風吹徹傳柑夜離火烘殘得意年  
不信龐然成大物要人擎弄到華筵

贈姚子文

蘭菊叢生谷水陽看人岐路哭亡羊狂吟覓句題花塢  
痛飲逢場託醉鄉雲慘綠陰晴日少風飄紅萼雨天長  
踏青鞋襪乘時著好聽新鶯一鼓簧

花下招陳含美李次鄴懷鏡渟鍾豫凡干南田陳

岱周季克紹小飲

養花天氣半陰晴爾許春光百媚生鶯鼓新簧殊有韻  
燕營故壘倍多情淺紅帶露臨窓重嫩綠翻風繞砌輕  
忙捲珠簾斟竹葉莫將塵網襲冠纓

閉門獨坐思無聊綠嫩紅纖入眼嬌斜月三分微蕩漾  
輕煙數縷暗飄颻憐渠濃豔誰堪匹對此窮愁或可消  
擬向花前拚盡醉藥欄東畔一聲簫

性近疎慵愧不才良辰雅好在擎杯高賢合贈琳琅句  
傾國同看錦繡堆春到殘時花更好人於醉後月初來  
相知聚首真難得莫憶平生萬事哀

訪李節珊

爲訪名賢步紫苔晴煙遙望夕陽開雲霞落處揮金剪  
龍鳳翔來賦玉杯夢絕繁華知道力氣干星斗識仙才  
補天能事今重見造化於君何有哉

味復齋綠萼梅次王京客韻

暗香遙襲綠羅襦伴我齋前一小株色似翠蛾纔點黛  
藥同元鶴乍銜珠欹斜瘦影枝偏傲寂寞空庭態自殊  
不與群芳鬪嬌豔半簾明月好相須  
庭梅綻綠映寒襦喜得窓前植一株苞染淺深螺子黛  
枝凝大小玉盤珠上堦苔錦香應遜弄影松針韻更殊  
獨占春光開最早等閒桃李莫相須

空明子詩集卷之八

古婁李節珊先生選

華亭張

榮景桓著

綠牡丹

不數隋宮畫翠蛾綠紗窓外醉顏酡天香湯訝藏么鳳  
國色何緣點黛螺苔錦襯來情自別鬢雲映處與偏多  
仙姬此夜如相探斜倚東風唱踏歌

牡丹乍試一花作

殷勤爲報鼠姑知寂寂閒房莫我欺羶膩筵中惟飲酒  
管絃隊裏少吟詩雖無繡幔重重護也有珠簾淺淺垂  
一炷清香消永日寶妝正合隔窓窺  
輕籠巧笑一枝煙脉脉柔情乍暖天寶鑑平臨疑滿月



舞衫才著惜華年風迴夜靜愁金縷日落春深怨翠鈿  
鶯燕似憐花事晚伴人寂寞苦周旋  
夢雲仙佩獨飄飄肯與群芳鬪豔嬌伴月夜深啼玉筋  
臨風羞重暈紅潮生憎媚蝶真輕薄還恨遊蜂太叫囂  
爲酹一尊仍自酌香魂應不嘆無聊  
夢魂苦被鳥驚猜帶倦看花首重回清露似拋紅粉淚  
酡顏如醉玉缸醅佳期不許鶯偷覩密約何妨蝶作媒  
杯酒與君相爾汝翠帷斜捲更徘徊

賦雨中牡丹

斜風細雨伴天香似樣溫存總斷腸翠幌不遮清淚落  
寶闌空鎖玉顏傷黃蜂那敢窺春色紫燕無端語畫梁  
脉脉含情愁未散琵琶錫鼓憶三郎

有感

役役勞生苦未停看他醉語正難醒貧能累我惟衣食  
利若薰心損性靈松籟幾回驚曉夢鴉聲時復下空庭  
如何不自憐毛羽還向霜天剪翅翎

與玉英兄坐話有感

浪擲浮生三十秋也曾年少話封侯饑蛾撲火高人笑  
孺子成名我輩羞千古是非終有定片時顛倒不須愁  
請看貴賤俱黃土爭似忘機到白頭

夢堽兒作

憔悴支離病裏身不堪清淚哭亡人三冬燈火消長夜

四壁琅玕付暗塵一自佳兒成大別幾回惡夢得相親  
可憐廿載憂勤意歷盡艱難到苦辛

夜坐

年來遭際益酸辛虛擲韶光幾十春爲悼子亡翻恨子  
因悲親歿轉思親接談日日期良友入幕時時怕惡賓  
非是私心太多慮中山前度結成隣

連宵夢想數晨興幾度哀傷得未曾恰似災時遭烈火  
又如寒日逼層冰忘情不獲師先醒懺過除非拜異僧  
惟仗佛輪回造化重來書館伴青燈

奉酬隱公大師輓章

緣溪覓友訪書癡瞻禮名藍有幾時數點寒鴉棲古樹

半灣流水浸疎籬詩箋寫意篇篇好茗椀談心事事宜  
誰料虎溪三笑後病軀哭子不勝悲

答自策禪師步原韻

病餘久已絕吟詩因悼兒亡偶寫悲風動暗搖崑桂影  
月明空照海棠枝定須堅整千尋檜敢望重生五色芝  
一著輸贏猶未卜眼前爭勝似圍碁

擇居示魯亭伊章兩姪

春草溶溶滿地香風晴日暖見紅芳欲求若個仁人里  
難得尋常君子鄉回首舊遊成寂寞側身長望獨翱翔  
梧桐竹實安排定願借高岡集鳳凰

寄玉壺子

一違仙吏到如今又被星星白髮侵敢望遐齡開後覺  
但緣幼子繫人心廣川落葉愁無着高樹棲禽嘆不禁  
朝晚閉門聊靜坐對花時或發長吟

坐對梅花憶孟昭姪

十年培養好花枝爛熳春光正一時豈料雨風狂太甚  
更憐攀折勢難支香魂合剩臨池影瘦骨惟餘傲雪姿  
最是夜深尤寂寞隔窓燈火費相思

感

海天無際水迢迢蟻國君臣影動搖千里河山歸正朔  
萬年版宇屬清朝豈知漢大真難敵未識人心祇自消  
廟算那須煩將相欣看玉燭四時調

展墓

三盞春醪滴九泉長言哀訴墓門前身如大海波中立  
勢甚危樓屋角懸愁病未完隨哭子怨人不敢况尤天  
可憐後嗣殊衰敗一度臨風一惘然

此身自分柱中流長子何緣一旦休止剩四郎交四歲  
敢祈千佛祝千秋詩書只望綿餘澤老大安能散舊愁  
拚我白頭勤教誨他年應許紹前修

返棹寄吳門諸子

打頭風急亂江紋樹色山光遠不分鷗立塘邊一點雪  
鴈橫天末數行雲捲簾望見秦樓女執手疑逢越鄂君  
何忍匆匆作歸計那堪楓葉落繽紛

登崑崙文筆峰

惆悵秋深入鬢毛攜筇躡屐敢辭勞城邊衰柳翻餘浪  
屋角喬松起怒濤接地線天通洞險插空文筆倚雲高  
廿年不到今重訪一醉閒房典緼袍

四兒痘殤詩以哀之

驚魂無定似然灰鬼語分明到夜臺疎雨暗燈催短夢  
亂煙孤館哭殘梅松花粘盞難消恨薤露傳歌易動哀  
鬚髮數莖拚白盡海鷗應不更相猜

示諸妾

無法堪求種子方只拚百計覓新粧可知涉獵詩書客  
不是尋常駟儂郎贈汝一篇吟麗句勸君三盞醉瓊漿

莫嫌垂白非佳壻京兆風流此更狂

遇仙

及笄時候破瓜年遇得先生是地仙歡笑似憐飛絮舞  
游行無礙落花妍徵歌鶯燕來窓外聽籟松筠到枕邊  
再看桑田三變海飛昇同上大羅天

咏柳

桃花初醒柳方癡蕩颺春心那自知散髮不教雲髻縮  
細腰偏許路人持枝棲黃鳥聲流韻花點香塘綠滿池  
誰道芳容易憔悴片時搖落曷勝悲

無題

錦帳春風萬象新六街燈火夜沉沉花深月黑人難覺

空明子詩集卷之八  
五  
柳暗星稀露未侵銀液三杯酬四美玉簫一曲抵千金  
可憐不作遊仙夢枉殺雲英半寸心

雨窓寄錢介維

愁雲漠漠鎖蒼天未許花枝照眼前一醉何妨畫作夜  
三眠空笑柳如煙春濤欲濺臨波檻燕剪初回傍戶椽  
馬足車塵徒碌碌便應終老學逃禪

西齋予家婢妾皆無鹽嫫母輩也蠢然下材書此謔之  
家貧無力覓纖纖庸陋兼全非自謙久處慣看忘嫫母  
暫時驚見詫無鹽彩箋半作包花裹玉管將爲剪燭鉗  
最有一端真可笑正襟危坐但莊嚴

莫秋獨吟

傳聞諸子聯詩社莫訝先生湯肯來覓句未堪酬傀儡  
擎盃每欲避與儻花開小砌憐同調蝶舞閒窓愧不才  
何事獨吟成寂寞案頭明淨絕纖埃

乙未二月一日抱秦松鬼口占

寒深日日醉酩酊忽報春潮長半篙已見淡黃粘嫩柳  
漸看濃豔著天桃家珍未敢誇麟趾書種殊堪望鳳毛  
且喜白頭重得子一生忠信戴天高

燈前菊影

誰把黃花號冷香背燈無語細端相蘭膏照去成空色  
鶴啖銜來見淡妝密蕊離離應似畫柔枝裊裊欲生芳  
夜深獨賞陶家種五美偏宜映粉牆

贈魯菴上人

避俗方思隱釣磯無心沙鳥自天機有僧策杖談真訣  
與我臨淵對落暉松塵拂塵忘色相蒲團枯坐欲皈依  
應知此理歸何地一片浮雲處處飛

答和俞梅亭見懷及兼念余峰魯菴原韻

無端春事雨中過敢倣先賢衣綠萼花信勒寒仍若此  
暮愁怯醉待如何懷人入夢三更未得句挑燈五夜多  
我道祇宜攻異學未知應否拜維摩

莫怪韓公痛舐排笑他妙用在搬柴不如玩世尋莊列  
且自酣歌並葛懷覓得詩筒兼茗椀伴渠竹杖及芒鞋  
松陵唱和堪追蹟嘯傲花間亦自佳

對梅花

身共庭梅好結隣每從寒處著精神入門只許投詩客  
開逕偏宜踏雪人老榦拂簷同傲骨冷香壓帽託芳塵  
讓他鶯燕乘時到攪亂紛紛桃李春

小齋坐雨用香山韻東唐春皆

東風吹雨滿天涯幽砌新紅泣美娃架上書籤餘潤著  
壁間詩句暗塵埋憑他車馬誇流俗未必清閒勝我儕  
但願羲輪常顧盼狂歌一日一開懷

用香山韻贈含美

昏花老眼漸茫茫想對親朋情益傷半世誰家能醉酒  
一年若個與聯床松風淡蕩看山色煙月朦朧憶水鄉

空明子詩集卷之八  
惟有春來鶯語滑吟成天地好文章

和干南田贈言

杜門卻掃絕纖埃忽報投詩今雨來綠萼半枝猶未放  
紅蘭一朵欲全開並非高節甘蓬戶祇愧瑤章擬釣臺  
惜爾夜光曾按劍碧窓吟咏恨難裁

寒食後二日同次鄴鏡渟赴潘層峰玉蘭紅杏花

下之酌

湯勞折簡遠相招敢憚攜朋躡屐遙才子向推騷雅伯  
名園況值豔陽朝一池綠水窺全面幾點青峰露半腰  
蘭玉滿庭看爛熳伴他仙杏暈紅潮

吳滄雪艱於得子至五十六後如夫人連舉三雄

今丙申歲偕老夫人七十雙壽又舉第四子諸

同人徵詩稱慶作此應之

七旬又報產名駒四乳欣看盡丈夫幾並竇家誇五桂  
已過王氏號三珠麒麟故故遊郊藪鸞鵠雙雙峙竹梧  
爭羨德門遺澤遠仲雍苗裔著勾吳

戲柬金德籓

莫驚議論一朝新我是清時無兩人書卷破來寧守拙  
甌塵堆滿不言貧睡餘只憶花如錦醉後常期月似銀  
願學孫登鸞鳳嘯相從世外作天民

得第二子飛熊作

已欣玉樹發庭墀又報芝蘭長嫩枝澤在祖宗真不爽

德垂天地果無私機雲誰道非雙鯉軾轍爭誇在一時  
珠顆玉芽懷抱裏好看頭角露英姿

與朱北才閒叙

何曾我與世相違不覺驚心欲掩扉路梗妖蛇春色暗  
晝飛哭鳥日光微風沙漠漠難睜眼枳棘叢叢欲刺衣  
抱膝長吟揮短塵一尊獨酌對斜暉  
銀燈挑罷對黃昏獨坐支頤欲動魂家乏兼金難結義  
津沉寶劍莫酬恩只餘修竹搖晴影惟有空庭印月痕  
不是鯁生拚閉戶此身休戚付乾坤

招張玉田小飲不至卻寄

敝居只好託貧交怕見冠裳到草茅徑曲愛看花妥妥  
齋寒惟聽鳥嘒嘒雲峰象外松低壓杯水堂前地半坳  
說古談今堪寄興酒徒詩伴莫相拋

喜沈耀遠過訪

北窓高枕綠陰輕宿雨初消看早晴客是羲皇同玉潔  
詩追晉魏見冰清草堂愛我無塵慮花逕因君遠宦情  
松菊緣深閑夢絕孤標應與歲寒盟

重陽後六日攜戴壻泛舟虎丘閱其近作頗慰老

懷詩以志喜

一葉隨風帶月行午餘飛渡兩三程半塘繫纜尋芳徑  
七里支筇趁晚晴黃菊已開秋漸老丹楓未下客先驚  
喜他小戴頻頻問攜得新篇慰我情



練川王汝師三昆莖其尊人士修諱爵號酒顛於  
姑蘓閭門外西南四里裏雙橋之高原因其力  
綿以拙刻二十部賻之

二十年前憶酒顛興酣落筆滿雲煙一貧留得常如洗  
三盞銜來別有天惆悵故鄉風土薄經營永宅子孫賢  
麥舟愧我無多貺廿卷新詩當紙錢

閱南映姪四吟稿賦贈

白雲吟刑部郎中時作  
一肩吟赴任桂林時作

獨宜吟刺郡時作  
江上吟  
陞遷後歸里省親途中作

喜逢小阮到柴關投我新篇足解顏騷雅宿推唐鄭谷  
風流重見白香山詩隨萬里皇程去吟逐三江鄉夢  
還但恐舞鸞銜紫詔未容久戀綵衣斑

義興儲六雅

諱大文

攜令子廷伯拏舟在顧因招

諸同志及姪甥輩二十餘人讌集兼訂後期  
不辭倒屣接嘉賓招集名流笑語頻金石盡爲堂上客  
芝蘭同作會中人千秋道義誰能匹一代文章孰與隣  
承許平原留十日季鷹本屬老閒身

去冬田租半收完官之外度日維艱家人告困作

此解之

布衣蔬食只平常儒者家風好主張醉後呼童茶正熟  
睡餘啓戶月生涼官租早稅身心泰魂夢相牽山水長  
課字莫誇兒可教膝前竹馬任徜徉

晚霞

崑崙山上會群仙王母來遊散紫煙丹鳳展苞迷遠浦  
火龍銜燭照長天如逆明月偏軒舉似挽斜暉故左旋  
誰謂海風吹易斷隋宮鎖得幾多年

渡春申江

萬條楊柳捲飛煙鼓楫中流浪拍天未許半篙能刺得  
豈容一葉遂安然原知隔板真無路且話餘生不值錢  
忠信涉波成戲語何由東海變桑田

自虎丘山塘步至道院

萬壽壇中瞻禮後觀僧

人誦經梨園演劇同周子

嫩紅滿地踏晴陽公子調笙化日長一逕遙通玉局觀  
三條直接御鑪香清歌彷彿鈞天樂絳樹低徊選佛

場寄語梨園須努力莫教曲誤顧周郎

支硎晚眺隨喜法螺庵

歷亂籐花樹樹紅石門中斷徑潛通戴顓攜酒柑初熟  
支遁還山鶴上翀鶯嬾不須啼暮靄蝶閒猶自舞春風  
法螺別有松千尺一踏巉巖到梵宮

自法螺菴拜趙凡夫墓

當年翰墨已寥寥幸有孤墳魂可招處士宅荒悲後代  
先生無子少微星暗惜前朝一生不遇鹿車共挽林泉隱與夫人偕隱  
鴻案如賓倡和遙夫入亦工翰墨何日一雙同化鶴歸來華表

話無聊

自趙墳至千尺雪聽瀑亭

沿溪覓逕訪潺湲松竹周遮鎖翠煙不料才離詞客墓  
何緣恍遇水簾泉噴珠激露真竒絕片石孤亭尚屹然  
傳是前賢栖隱處寒山一帶傳是趙宦光先生故宅幾經費盡鑿山錢

千尺雪係先生雕斲而成

自千尺雪步至華山亭子有感

紆迴僻徑見飛僊陸續籃輿滿目前春色不辜遊女興  
花枝應讓美人妍生憎石蘚留弓印勾引山僧憶翠煙  
老大那堪温舊夢風流輸與杜樊川

自華山轉至范丞相祠兼步長白先生廢園

重尋舊路陟高岡丞相祠堂草半荒在昔龍光真不忝  
到今名姓有餘芳先憂誰弗欽鴻論遺澤猶能設義莊

婉轉橋名范長白建廢園成寂寞漸漸麥秀已滄桑橋下成平陸今俱為

麥

自范園登山過龍門閱萬笏朝天諸石

驚看萬笏果朝天上帝高居禮衆僊遂有龍門通絳闕  
豈容毛女落松顛山險絕遊女所不到參差墨玉層層出修潔元  
圭面面懸笑指行踪人不到已疑身臥白雲邊

自萬笏朝天重登天平山絕頂

孤峰突兀衆山巔探徑空勞望眼穿上去竟同猿覓果  
下來應笑鶴橫天渾身是膽重登此滿肚閒愁始脫然  
萬死一生尋舊路白雲古洞鎖晴煙白雲洞在龍門直西百步

自天平山步至舟中

暮霞燦爛滿遙天策杖相看落照邊山鳥會心隨意語  
崑花弄影一枝妍插空石壁通幽徑夾路松濤送上船  
欲覓勝遊何處好歸舟屈指問長年

自吳門放舟至常熟訪仲雍故跡

齊女門邊鼓棹頻啓窓回望玉嶙峋煙迷野渡渾疑盡  
日照晴湖竟似銀垂柳萬條搖斷岸流鶯百轉送殘春  
吁嗟一葦無多路載訪荆蠻古逸民

虞山謁言夫子墓

海虞秀絕此山川瑞氣盤旋產大賢歷代烝嘗原不爽  
新朝雨露更無邊時賢齋新補世襲五經博士牛眠定許千秋貴馬  
鬣應知百世傳拂拭豐碑苔蘚合夕陽古木起寒煙

登常熟西山望尚湖

鶯啼花落柳拋綿疊嶂層嵐對巨川石磴下空飛拂水  
劍門中豁露遙天懸崖宛似堆紅玉絕壁依稀聚紫煙  
我醉欲眠山頂上好看明月照湖船

自常熟歸舟中作

片帆高挂渡江城綠柳青蒲夾岸生五鬣鬱葱含宿露  
伯勞言語報新晴落花自怨春無賴細草猶憐蝶有情  
指點茂林藏古刹笛聲吹徹牧童橫

王範之先生在顧留飲小叙

十載相思度歲華湯勞枉駕一鞭賒如君當世文章伯  
推我於今理學家無論是非終幻泡且看富貴等空花

白頭俱幸重生子把酒言歡日未斜

去冬營葶曲江濱不覺重看淚點頻念子一生無失德

師子廿載作全人白楊苦弄蕭蕭影紅日忙飛急急輪  
泉下酒漿誰復奠那堪宿草捲輕塵

臥病

連年臥病本尋常潦倒殘生若探湯當食但嫌滋味變  
下簾還怕景光長投來苓朮非佳劑拋卻詩書是秘方  
到老不過三十載枉勞簸弄小兒忙

小窓

小窓曉起凭闌干綠樹陰濃帶淺寒病後品泉誰共語

睡餘把鏡獨相看庭鋪書帶偏名草盆貯珍珠亦號蘭  
旋捲湘簾容燕入不知日上已三竿

病愈獨坐回憶致病之由湯賦

雕梁只許燕飛回蘭菊叢叢覆藜苔猶憶峰巒欣獨賞  
多緣攀陟苦生災簾搖晴影看無定花打閒窓鎖不開  
跌坐閉門君識否一龕燈火病如來

病起看兩兒閒耍

兩兒日日好周旋竹馬鳩車到眼前催老韶華將六十  
緣愁白髮已三千相看撲蝶尋梅豆更要驅蜂捉柳綿  
遮莫畫梁雙紫燕呢喃並坐說流年

無題迴文同介山姪作

啼鶯亂處是晴天早起先來望柳烟鷄唱曉寒驚夢短  
燭搖奩影弄妝妍萋萋草濕苔階潤剪剪風輕燕語便  
西閣小窓蕉長綠低闌碧樹繞流泉  
蛩聲一夜徹西堂老榦桐陰碧蔭長  
冑鎖舊愁懸玉佩帶圍新恨散  
蘭香龍盤繡額遮高髻鳳舞金鞵踏響廊  
峰遠暗消雙翠黛鐘鳴聽罷理殘妝

南映介山昊霑三姪及映璿陳甥爲我經營壽域

心竊感之作此致謝

老妻卜莖費經營兼造生墳看落成郭氏有甥稱奕奕  
謝庭無樹不菁菁敢誇若斧追前轍豈得如坊炫後生  
藉爾衆擎真易舉因思兄弟涕縱橫

莖先室吳孺人後蒙範之王先生到山展八拜之

禮作此志感

先室去世因身老子幼繫不受弔王先先生到山堅辭不允故有此作

忽聞嘉客遠相將一束生芻詎敢當下士寒荆真潦倒  
大賢隆禮異尋常半丘豈足傳終古撮土奚堪問若堂  
慚愧達生誰似我悼亡應不做潘郎

贈蔣漢襄

有序

老友蔣漢襄年當八十高隱塔灣令子虞尊孝  
養備至兩孫總角雅好斯文遐齡講學似續古  
人酒癖書淫當今無二獨居一室謝絕酬酢者  
十有餘載矣予因喪偶意欲莖先室造生壙緣  
曾有宿約登堂敦請欣然就道慷慨廉介世莫

能比有言必踐白首如新予何人斯當茲雅愛  
惟有作詩銘感以示子孫而已

不辭年邁涉江濱古道如君有幾人  
虛老黑貂生白髮獨蒙青眼出紅塵  
護沙起伏岡陵固環水紆迴氣象新  
存歿雖殊同一穴歿生均庇太和春

自墓畢歸里忽聞華妾產亡詩以哀之

族四世祖遷於吳閭今歸我九年學詩學字畧  
有可觀著作頗富新不示人未及付梨棗聊錄  
其七言律詩二首以當哀輓一章云爾其一云  
萬柳參差映碧波無端春思困人多鴛鴦慣浴  
池塘雨日月常投天地梭豈有詞章堪織錦並  
無書法可籠鸞低頭細數嬋娟夜一半愁腸付  
病魔其二云斷續蘭膏夢未分爐烟繞幔氣氤  
氳乍醒苦憶三更夢不語還焚百和薰玉馬弄  
風嘶盡閣金魚吸水動流雲臨窓笑向相如囑  
莫說羅敷善屬文閱此二律可傷也已

幾經望爾笑顏開豈料重生蕙帳哀  
萱慈有胎終不吐蘭蓀未長竟成灰  
何堪莊缶敲還缺轉恨潘床塵滿堆  
欲寫慧心頻閣筆暮年夫婿愧菲材

墓先室畢即於墓旁建德福山莊

墓在三林鎮東南約二里外地  
名德福橋今即後堂供吳孺人神位蒙李節珊  
以名其莊云

先生書贈柔惠且直四大字匾額鴻飛鳳舞真  
不世之異寶也拈成四韻以示後人

佳城鬱鬱起層臺丙舍新營傍水開  
豈有嫦娥竊靈藥反勞燕許挾天才  
纖波濃點看書法屈玉垂金見體裁  
但願後昆常寶護莫令蝌蚪暗塵埃

故交俞日如夫婦俱享大年惜無子歿後貧不能

墓予與奕山弟南映姪哀錢以付其甥丁昭服  
墓於上邑法華鎮之先塋昭位焉

交游四海半沉淪身老家貧孰與親顏氏有棺徒寂寞  
鄧家無子最酸辛渭陽賴獲賢甥在馬鬣還依先壠新  
獨繭不勝求共助惠連元達總超倫

辰如天如兩人係同胞手足於予爲五服兄弟俱  
夫婦齊眉子孫繞膝因其力綿今將義米餘貲  
爲之各造生壙附於叔考之昭穆焉

左昭右穆附先塋各造生墳及早成有子有孫俱乏力  
難兄難弟總關情須知落葉歸根老豈比浮萍逐浪生  
從此荆花復暢茂九泉神聽亦和平

老友何乘策者俠丈夫也退老谷陽晚年喪子偶  
遇於蔣塔灣座上聽其備述歷經惡况受侮不  
少真令人憤悶欲絕爲作此以弔之

暮年失意足嗟吁老屋頽垣亦見誣豈料雨風狂片刻  
遂令黑白混須臾滿盤直欲同歸盡一着猶能不服輸  
獨有童烏堪痛殺幾時重得鯉庭趨

王子周先生欲營墓祖父兩世力有未逮予感其  
孝思真摯鳩貲捐助詩以哀之

每思負土淚常盈卜墓今看漸有成兩世寧知大厦傾  
一坏翻覺太山輕驅馳易令朱顏改歲月空驚白髮生  
感爾孝烏能反哺吹簫來會不勝情



蘇爾卽事迴文

天陰綠樹拂寒香  
謾謾松濤引籟長  
泉挂瀑晴懸白練  
竹搖春靄散清霜  
鶉啼獨悵空殘夢  
蘚綠凝愁傍短牆  
眠起數看驚宿鷺  
綿拋柳岸點閒塘

川晴照眼柳回青  
望遠徒憐似醉醒  
烟捲暮愁牽斷岸  
草滌波影動孤亭  
年華記恨空流水  
語笑追歡憶落星  
妍態弄花梅榦瘦  
天遙映閣繡圍屏  
鷗閒伴我許開襟  
遍立欣看愛翠林  
酬唱寄情怡碧水  
潔清標意戀遙岑  
秋深悵望空槐柳  
日落悲懷動古今  
幽徑曲廊環石砌  
愁多鬢白雪霜侵  
風打空庭閒落英  
醉殘惟坐小窓明  
東牆臥老嗟頭白

北閣看魚釣澗清  
銅鏡照簾搖日麗  
玉環懸帶壓衣輕  
叢叢桂樹添蒼翠  
桐鼓新聲聽鴈鳴

游仙

玉皇昨夜擁紅雲  
直入天門凌紫氛  
控馬老奴王武子  
抱琴小婢卓文君  
黃金几畔雙成侍  
白玉階頭百和薰  
賜我一杯三日醉  
醒來猶覺氣氤氳

送吳霑四姪計偕入都

帝城春色滿蓬萊  
囑爾征帆及早開  
風送滕王原有意  
雲生馬足豈難猜  
懷才正合投明駟  
射策還應動上台  
待我六旬初度後  
日邊來

予自己亥生至戊戌上巳日適當花甲一週

臘月二十四日家讌

一年惡况苦難陳此夕長言不覺頻操白獨思戒旦婦

先室最善操持添香還憶校書人華妾頗工吟咏且看子女雙雙舞共

慶庭幃事事春把盞莫辜桃葉意鸚螺酒面感紅鱗

六十自壽

開簾晴色滿春山介壽稱觴足解顏幼女能調長女笑  
大兒故學小兒頑沙鷗有意人爭潔海鶴無心雲共閒  
從此好為雙屐計遙岑踏遍鷓鴣斑

空明子文集目錄

卷之一

茸城賦

西子湖賦

登吳山望錢塘江賦

卷之二

我園賦

浮雲賦

竹夫人賦

秦望山賦

三昧庵賦

九峰賦

三泖賦

掃墓賦

卷之三

拳石山房記

游支硎山記

游寒山記

游天平山記

游尚湖記

謁言子墓記

游虞山拂水巖記

邑神東園記

游橫山記

老桂記

海湧峰記

夢記

卷之四

唐餘年小傳

謝亦山小傳

朱萼江先生傳

雲蟾姚師傳

穹窿亦圓師傳

杲如師傳

盛小叢傳

陳含美壽序

追貶竹夫人篇

華姬述

卷之五

告亡友朱秉士文

高寒先生趙君墓誌銘

亡室吳孺人行畧

贈錢道人能持戒律說

瑞蘭說

飼猫說

惟恐不好名論

寄友人書

閱明詩焚書亦快秦句

忘心子

卷之六

空明子

戲題空明子小影

七塔居士

卻病法

題關夫子贊

魚籃觀音贊

呂祖贊

魁星贊

鍾馗贊

竹杖銘

硯銘

自斟壺銘

李商隱說詩

上邑老翁

九月識字

斯文穢氣

還魂

樸村種子方

反胃症

畧帶鄉氣

浪得虛名

守先訓

譽子弟

節珊晚霞詩

種鬚

樸村輓先君詩

摘先君飛瀾公詩句

客謂

華生

登虞山

聖人界上

人物不多

敝帚

少年立身

錄四吟稿序

值得

高壽

空明子文集卷之一

古婁李節珊先生選

華亭張

榮景桓著

茸城賦 有序

予素性不愛動而愛靜不嗜酒而嗜茶不喜繁華而喜  
 山水生平無常師然亦靡所不講弋釣之方博奕之技  
 知之而弗為也鑿卜之書星相之術孫吳之學研之而  
 弗好也農圃之事計然之智百工之藝能之而弗屑也  
 修齊之道平治之理習之而未純也閉戶守拙硜硜自  
 好不敢妄交一人妄與一事惟與二三君子品名泉試  
 龍團亦設醴酒任客自醉自去絕酬酢之迹時當春秋  
 放扁舟泛晴浦往來於吳越之間得一佳山水便盤桓

竟日戀戀不忍遽去興盡卽返歸則獨坐一室尋繹聖賢義理泛濫諸子百家茹英咀華廣居自得所以視富貴等浮雲寧與鹿豕遊木石居也又最善病自少至老舍讀書之外無他好讀倦輒病病已復讀或勸予曰年齒日衰無乃憊甚其柰賦性頑鈍卒莫能改今春復病幾死因念身本茸城人也峯泖之勝古來僅見小篇卽郡志所載松江前後兩賦亦不過寫嘉禾笠澤之事要非松江之故典也心竊非之爲著茸城一賦約五千言有奇兩日告竣嗚呼古人十年作賦猶懼不得當於世矧予學識寡陋聞見淺鮮漫然搖筆伸紙爲前人之所不會爲又刻期而成得毋令二陸諸公胡盧於地下乎

然詞雖未工旣已作之寧忍棄之縱不敢遽邀當世之知姑留以贈後人之覆瓿又何不可其辭曰

啓草昧於洪荒滙東南爲澤國疏三江於旣入仰神禹之大德洩巨浸於滔天露海濱之沙磧藝禾黍之芄芄民始得而粒食羽族於焉來巢毛蟲於焉託迹人生生而日稠地熙熙而日闢旣五茸之成城爰建亭而作驛壯壽夢之遊觀試蒼鷹之健翮鳴鉦則穴獸失魂伐鼓則棲禽喪魄曾幾何時而化爲勾踐之疆域迨越亡而入楚遂爲春申君之阡陌暨秦併天下而長水陷爲犬澤置婁縣以屬會稽祖龍巡幸而望東海之無極自漢以來屢經變易斗牛分野各家管測至元朝始升府而

號爲松江 皇清分四縣而作屏有赫縱橫則不及二  
九周環則大約八百其爲山也則有鳳凰鼓翼天馬行  
空赤壁標奇於江滸澱山晴聳於湖中竹嶼之綠筠蒼  
翠覆船之黃土穹窿大金則滌波蕩日小金則霧鎖烟  
封橫雲之石壁疊紫細林之僊跡留踪崑岡有璘珣之  
白玉余嶺多挺拔之籜龍達岸則波濤吞谷鍾賈則鳥  
雀呼松玉屏不產羅池之藕庫公爭採紫沙之鬆陸寶  
空夷爲平坂機峯徒嘆乎大風巖山杳杳而莫考廬山  
蕩蕩而常通土山一坏而如垤城山環拱而如墉查山  
之丹井煉藥斡山之劍石櫻鋒若秦若柘今域中作鎮  
若羊若蘓今海外稱雄况若許若浮若勝諸島嶼尤非

一目之所能窮其爲水也大海轟其東三泖凹其西北  
有吳淞之洩瀉南有申浦之會歸若夫薛澱之浩淼奔  
注趙屯大盈諸浦而匪朝伊夕滄瀆之滴滉承受青龍  
白鶴等江而辨派分支涓涓則有東西山涇之曲折澹  
澹則有南北曹塘之逶迤五色燦爛兮谷水靈源三姑  
容與兮柘湖渺瀰蕩有白牛之異塘標駟馬之奇崧子  
與華潮並列蘓溝及梁紇同題會仙不若集賢之美石  
白爭如玉帶之圍和尚荒涼兮子無風韻秀才藻麗兮  
綽有天機爛路港邊望平川之若鏡採花涇側愛夾道  
之柔萸龍潭不見白雲之起鶯脰奚聞黃鳥之飛故細  
流之汨汨則膠舟而露石巨浪之滔滔則觸岸而崩隄

急湍之濺濺則捲煙而滾雪驚濤之浩浩則折櫓而摧  
桅御史都臺因官號浦鹽鐵米市緣貨名溪蒲滙築清  
流之閘淺沙泛渾水之泥條大而條小視四時之消息  
忽長而忽落準弦望之盈虧潮一日而兩至雖長年三  
老對此而或迷其風俗戶重詩書農勤耕種安土重遷  
謹守繩尺商賈輻輳家多居積夙號富饒禮義之邦今  
則變章程而異疇昔競尚奢華不謀生殖賭博大興千  
金一擲出則鮮衣乘軒入則家無擔石朝遇之而列鼎  
大烹夕逢之而蔬水蹙額游手多良善之膏庶姓僭王  
侯之宅春花秋月畫船滿棗履之翩翩賽會迎神惡少  
索銀錢之亟亟病不信醫而信巫以致天札之恒多民

不事人而事鬼未免公私之交迫弱者過於委靡强者  
隣於殘賊好訟則華上居先因人則婁青頗刻士風不  
變古訓不飭未能叶韻居然詞賦之宗畧解揮毫便謂  
文章之伯此猶好名之流不過名浮於實若乃借衣冠  
爲長城混是非之黑白仁義不講孝弟罔識顏子見而  
心傷孟氏聞而腕扼此風俗之一壞也市井蕭條門如  
刺棘百貨不行憂心惻惻嗟課鈔之莫完見信牌之拘  
逼圖蠹爲之生波地棍爲之尋隙勾連不檢之勢豪又  
從旁而彈射消磨其貲本斫斷其血脉遂使十室九空  
通衢削色無論富商大賈誰不嘆點金之乏策四方之  
行旅罕至卒歲之米鹽相乞神仙之玉佩典酒而不留



卿相之金貂原物而奉璧但見奔走之未遑性命之奚  
惜此風俗之又一壞也乃有細氓勞其筋力幸邀雨露  
之濡多收十斛之麥意欲易妻而造房拖綾而曳帛置  
酒歡宴杯盤狼藉用如泥沙莫可遏抑及至室如懸磬  
樂郊安適抗官租而弗輸累業主之受責早則巧言支  
吾末則大肆狂逆不得已而訴之有司每遭官役之面  
斥徒令人呼天而莫告亦多田多累而奚益豈無良民  
不輟紡織築塲納稼婦子悅懌綢繆牖戶惟恐弗克奈  
奸佃之作俑遂倣尤而匪僻雖勸諭之諄諄究心面之  
難革此風俗之又一壞也其土產米則有瓊脂之雅號  
玉粒之美稱龍枝分大小之私雲渠發赤白之英箭簇

千畦之稻香聞十里之秔穠極紫芒同其植羊鬚烏口  
異其耕紅蓮則鮮芳比色金釵則燿燦象形別有五月  
早刈三月插青莫不以孝以享縈爾染盛麥則有舜歌  
纔茂紫稈畢呈或如野燒之作發或如白雲之常凝來  
及牟今平鋪乎大坂穠與蕎今散布乎高塍菽則有先  
蠶而熟交夏而成粒綻鸚哥之綠品同佳味之登看小  
寒之繼起漸裙帶之相仍欣龍爪之拏攫愛香圓之素  
馨紫羅之花紋奕奕白藕之延籬婷婷旣紅黃而間色  
亦菜黑而同行蔬則有蓴絲之柔滑蒲白之鮮明春菘  
兮潑潑秋韭兮菁菁波稜之甘較薺芥蒜葱而爭勝茭  
芽之嫩與蒿蕒茄莧而夸能欲擷苻兮江之曲爰採芹

兮沼之清萑苳芫荇沿村而下種蕪菁蘿蔔遍地而敷  
榮瓜則有大如鷺卵色比金精九甜著名於村落黃橋  
騰價乎郡城筍與王兮俱堪入醬冬及絲兮亦可爲羹  
果則有梅豆如珠杏實若鈴莢綠枝而纍纍李附葉而  
星星櫻桃怕白頭之啄枇杷畏紅日之蒸柑橘滿園菱  
藕盈汀梨芡則同盤而若友棗柿則並種而如朋銀杏  
則陰遮乎後圃葡萄則架滿乎前廳石榴則含苞而孕  
錦香櫞則似柚而如橙雜植則有澤蘭采葉菖蒲取根  
枸杞捋子薏苡用仁笋有象牙碧玉竹有鳳尾觀音松  
柏成行誰攀楊柳桑榆夾路不數蕪蘅梧桐託體於庭  
阿杉檜挺榦於岡陵牡丹則寶樓爲最芍藥則金帶稱

尊山茶若醉海棠若淫薔薇若妬木香若瘖芙蓉若笑  
紫薇若吟玉簪若碾錦帶若繩棣棠若偃金鳳若興酴  
醾若泣葵花若傾木樨若綴水仙若擎辛荑若佞郁李  
若親雖分門而別類總更僕而難名畜則有九十其孳  
蜀守則眠於高岸三百維群主簿則散於荒村早市競  
開黑面郎君之沓沓夜戶不閉黃耳使者之狺狺禽則  
有丹頂鵝之可玩綠足鶴之堪珍鬪鴨靜觀其忿怒鳴  
鷄蚤辨乎晨昏燕子翩翩而入室鴈臣繹絡而來賓鴉  
鳩呼晴於林畔鸚鵡覓食於江濱黃雀飽粟而始腴黑  
鷹籠臂而能馴文鷄依依而跂足雄雉泄泄而揚翎野  
鳧之文采絢爛鶻鶻之毛羽繽紛更有新鶯求友候春

明而出谷嚶嚶水族則江有桃花流水鱖爲盤餐之美  
味細鱗巨口鱸爲吳下之大烹縮項畢收於網罟膾殘  
咸貯於筐籬邇有如刀之鯨凌波刻玉似雪之鮓跳浪  
翻銀黃頰急急而莽莽白小雅雅而紆紆浦有推沙乘  
潮而猝至比目雙游以相并玉版縷絲以作麪鰻鱸剔  
骨而帶腥海有鮓鯨之類梅鱖之倫石首辭夏河豚迎  
春鱸鯉暴鬻於溟渤鱖鯉振甲於蓬瀛公子有無腸之  
蟹美人有戴殼之蛭蝤蛄爲未叔酷好彭蠡爲樂天解  
醒青蝦則雙螯若筋白蜆則一點如金水母蛤蜊味俱  
淡泊海螵牡礪性亦和平布則有紫白之錦方紋之綾  
三紗木棉之織兼絲帶苧之紆上海林塘之制作華亭

葉謝之經營別有燈籠梅花之式錦毯剪絨之文蒲鞋  
羣推其儉樓笠共賞其真吳鹽兮勝雪香酒兮旣醇蠟  
黃之膏藏之磁碗銀絲之豆貯之銅瓶彼服御之錯出  
技巧之日增方千變而萬化又豈筆墨之所得而勝其  
府治則有水陸四門華婁附郭上青分治專城特築金  
山一衛巍然海角爲鄉則一十有三爲區則一百十六  
九團之煙墩有如碁置四邑之封疆犬牙交錯文臣則  
濟濟將將武將則雍雍穆穆柰糧重而賦繁煩胥吏之  
催促雖典男而鬻女亦維日之不足旣連歲之告災致  
下民之躑躅五月欲賣而無絲六月思糶而鮮穀徒懸  
釜而塵甑呼彼蒼而痛哭凡有百金之產者里黨群視

爲几上之肉悵萋稗之弗芟曷佳苗之能熟此合城市  
而皆然不止方隅之鄉曲無怪乎一貧不能復振棄仁  
讓而爲劫奪之俗衙署則有府堂之雄壯四廳之聯續  
兩縣之軒敞佐貳之輔轂凡下邑之喬皇無不做郡城  
之規模而立局學宮寬廣泮池環玉斯文肇興尊經高  
臺又有灞橋細柳之威嚴烟江八陣之整肅沿海列鎮  
之高牙各城汛防之大纛以及諸叅戎之幕府俱堪靖  
四郊而鎮荒服又有巡臺巍巍察院嶽嶽棠溪則近乎  
東南鶴城則隣於西北天府稻梁則倉廩爲比比海關  
稽察則財貨爲鹿鹿督鹽之廳在西湖巡檢之司在各  
屬養濟之院在谷陽惠藥之局在醫學稅課司獄殊其

班僧綱道紀異其籙橋梁則在城有如虹之偃在野有  
如龍之伏若高若低若磚若木若穹脊之大阜若虛中  
之夏屋總六百有奇之蜿蜒莫弗化巨川而爲平陸其  
第宅則有孔氏僑寓之室陸機讀書之臺野王之高丘  
俱草荒而烟鎖袁崧之故址亦風打而塵埋文節衛公  
空傳蕭寺逍遙朱子併乏湖齋南村花落宗儀之餘韻  
猶存否也雙松老去子昂之遺風今安在哉醉眠一覺  
識造物之皆虛環綠凝眸夢化蝶而奚猜知止誰能誇  
夏老之見幾而作辭榮孰肯羨章公之早賦歸來玩芳  
則超然世外真仁則自遠禍胎翡翠碧雲向菱村而高  
峙光風霽月對絕巘而弘開芝蘭則朋儔結契映雪則

獨坐言懷芳草萋萋想生意之不少鳳山寂寂亦烏有  
之堪哀蓮巢崩塌秀野摧頽白玉窩中不見高人之臥  
竹居堂上閒看落照之斜歸鴈則嗷嗷於天表見之者  
應還轅而返轡晚風則謾謾於松間聞之者自意懶而  
心灰筆議繼春秋之史蓬臺開樂府之階方壺則一榻  
偃仰曲村則百道紆迴水心獨昭其閒曠雲錦徒眩其  
崔嵬來青覽輝不若萬卷之鴻寶梧谿綠吉豈如芳桂  
之絕埃結雲山於不碍抱鐵硯而徘徊採芝則研朱點  
易勤織則散綺成霞終慕則聿追來孝世濟則接武承  
家同善則一門脩德詒穀則奕代栽培寧僅樂琴書以  
消憂亦且對蘭雪而不數蓬萊歷千年而屢遭劫火淒

涼惟見瓦礫之成堆賜第建將軍之旗鼓華堂喧車馬  
之霆雷洎本朝而定鼎向城外而安排瑯琊之莊橫  
亘半里清河之第直跨中街其餘之高堂峻宇飾美增  
華展不完四十里紫絲之步障看不盡河陽滿縣之名  
花其冢墓則陸氏有十三之墳竿融有傍涇之隴考劉  
陽侯之永宅世罕能明稽左將軍之幽宮一拳徒聳曹  
夫人則窆於亭林丘府君則標乎仙塚顧宗誠則崧塘  
半歌聰道人則豐碑高竦少保之山犁爲平田尚書之  
墓穴成大孔濮陽王則葬於小貞蒸土造壙理宗妃則  
埋於駱駝不盈一拱三教遺逸蛻骨空門靜樂先生不  
傳世統回首望賜祭賜葬之公卿反不及詩人之儲泳

卽看三高士之高蹤誰復有樵於處士之壟其寺觀則有東西古刹南北名藍城隍之司視郡邑爲隆晉土地之職若府史之在官琳宮梵宇莫可數殫上而天帝佩玉鳴鸞下而冥王執戟擎旛縷析神明之誕條分社稷之壇乍鑼鳴而鼓震忽竹品而絲彈老子籠青牛之雙角大士遮紫竹之千竿仰神通之廣運駭締造之浩繁或遊戲乎船子或獻技乎魯般鐘有江上之浮木有井底之攢賜額則不過三十濫觴則創建無難但見祥澤之院谷水之潭崇真之寺太清之菴興聖之塔長壽之山靜安之僻龍華之灣法忍之廣慧日之巖無不墻傾而殿圯觸目而心酸因下民之日困致僧道之難堪獨

有財神與旺廟貌莊嚴然投桃而未能報李若將對斯人而面目生慚豈甘倣時賢之作用饜酒肉而不以爲貪其人物則有六齡懷橘名動侯王弟兄並美冠世文章敬輿繼起奏議煌煌正色立朝鳳鳴高岡挽回造化翊贊有唐逮乎柳約忠擢侍郎櫟齋講學衛氏克昌凡事君而不媿名臣必居家而孝道克彰徐本道誠能格父金子安禱感上蒼趙思恭嚙臂進肉張榮一取肝作湯沈得四毀體而療祖居宗成捨命而救亡徐誠之割股子和父藥趙璧之重法弟代兄償捐貲建學輔之則較長往哲作文遙祭月麓則無愧天祥扣軍門而活人殷公源則義聲激烈表王忠而寃白夏尙玄則儒服倘

空明子文集卷之一  
狎義士有碑而赫赫長者無號而堂堂此皆天稟之獨  
厚賦性之慨慷又有儒林文學厲志縹緲姑勿論先達  
之詞華聊與言草野之留良百咏潔淨華谷鏗鏘山英  
秀拔碧壺激昂玉巖博綜肖梅光芒敬菊經術安雅頡  
頎易癡蘊奧茂實騰驤伯全端重文澤汪洋養正豪偉  
汝噐蒼茫堪一斟而一酌要當與海叟而同長雖及身  
而不顯奚令聞之足傷笑白馬而金鞍徒滾滾於名場  
抽楊枝之三丈閃青燐於北邙故凡有一材一藝之擅  
美罔不比擬乎圭璋繪素之事醫藥之方金錢之卜朱  
絲之張苟修名之早樹亦世遠而流芳別有慕樂土而  
來遊戀泖澱之滄浪遂相度而作宅同避地之佯狂擷

春蘭之早秀采秋菊之晚香寄遐情於詩酒終不返乎  
故鄉爰子孫之入籍述祖德而稱強乃有守貞不字操  
比共姜或一門三節或感憤身戕或撫孤成立或剜肉  
割腸或名門望族或下里名娼幽復幽兮燈半明淒復  
淒兮夜未央俱脫簪而囚首穿麤縞之衣裳有幸邀朝  
廷之旌表有終身貧苦而悽惶故凡忠孝節義之事咸  
爲名教之勳勳主持世道者不容掩潛德之幽光又有  
跨麟騎鶴俯視滄桑訪素雲於福地問古院之老樟或  
誇幻術之似元放或羨壺隱之度長房更有德誠之莫  
測偕鰥子之行藏結道場之弘麗俾釋教之難忘三大  
佛則端居寶座衆羅漢則列坐迴廊方丈則上人棲息

禪堂則衲子連牀無弗香焚金鼎瞻禮趨蹌此茸城之  
大概亦四縣之相望雖土風之不一鮮此劣而彼臧凡  
百君子預爲隄防庶不隣於陷溺或能致汔可之小康  
亂曰吳淞之江神禹䟽導兮周公之墩海潮衝激兮五  
茸之城吳王射獵兮春申之浦黃歇鑿兮始皇馳道崑  
山南兮泖谷之水冬溫夏涼兮九峰之名凌崑位置兮  
水陸之池龜聽經兮慧辨立脫東坡作詩以哭之兮安  
分齋額晦翁書兮心鑑誕生異香聞兮思鱸有巷高風  
千古兮石幢湧泉朝夕沸兮安公之像肉身猶在兮赤  
脚道人使令一獠兮金山神魚聿來朝兮蘆子渡口兼  
葭蒼兮義虎說法鬼投書而悔謝兮折桂高閣忠定生  
兮鸚鵡一洲淪於海兮文翬之渚群雉集兮積薪自焚  
秀建塔兮瑞光之井金鰻現兮綾錦堆畔桑柘稠兮石  
筍之灘玉璘珣兮赤烏古碑叢林燬兮陳朝雙檜今不  
復存兮綠雲洞深鐵崖志兮升仙之臺可交逝兮瓢湖  
小隱士安偃息兮求忠書院祀正學兮絃歌深處草荒  
荒兮棲鸞夢燕烟朦朧兮筠溪義塾古道照人兮勝蹟  
弘多不可殫述兮天生蒸民庶且衆兮旱澇洊臻歲屢  
凶兮不知節省物力竭兮浮靡日甚俗漸貧兮財賦之  
重甲天下兮民之無良亦孔羞兮曷以救之尚其富之  
而教之兮



西子湖賦

有問津先生者遊八極跨四溟逍遙蒼冥之上俯視錢塘之城喟然嘆興曰此誠東南之瑤島吳越之蓬瀛昔人擬此湖爲西子真乃不忝乎佳名徒結想而奚益庶連袂而定情於是攜箬笠杖玉鳩訪明聖泛小舟天清似鑑水碧如油鼓桂楫兮長嘯凌輕風兮優游爾乃過斷橋踏十錦塘名煙茫茫風凜凜樹蒙茸而半歌鳥側目而未寢瞻孤山之鬱葱笑一拳之若枕忽玉笛之悠揚愧宮商之難審爰登西冷橋名眺兩堤織垂楊兮叢茂鋪芳草兮萋迷橋則俱六名則各題垂虹千丈橫亘湖西旣前後而並築奚裏外之不齊則有傑出湖亭高徹天

際綠波下浸搖漾金翠隔一水之盈盈想伊人之在是  
閒莫閒兮水自流淡莫淡兮雲無意對空碧而目成倚  
夕陽而心醉豈其海上之蜃氣結樓臺於無地其在朝  
也旭日升山光清貴妃初沐少女娉婷繁花吐豔白鷺  
梳翎鬢髻兮水晶宮殿依稀兮雲母圍屏其在暮也晚  
霞生石骨紫照曜千頃瓊英累累紅日西沉明月東起  
宿鷗拳足老魚躍水影漪漪而無定風簸弄而不已其  
在陰也山容黯澹岸草碧鮮孤鳧出沒古木裊煙織羅  
薄縠著體輕便不施鉛粉顧盼生妍宛凌波之仙子啣  
洛浦之空傳其在雨也石燕翔商羊舞霧鎖花鈿烟籠  
眉嫵暢湯泉之一浴潤柔肌之微污迨狂霖之不休悵

雲鬟之莫睹似高唐之神女迷陽臺於終古其在春也  
則有桃花呈豔柳線飄絲嬌紅嫩紫鬪媚爭奇鶯鼓新  
簧游女弄姿念良人兮天涯步長隄兮遲遲惜芳辰之  
易逝獨撫景而攢眉其在夏也則有十里荷花爛鋪錦  
繡香風時來直入窓牖亦有名流開襟露肘傍水次兮  
張筵就綠陰兮酌酒豪飲則白傅低頭狂吟則蘇髯俯  
首其在秋也則有桂子飄香三潭印月長天如洗清歌  
早發織女銀河嫦娥宮闕映素波兮一碧蕩空明兮不  
散愴壯士兮悲秋踞樓船而激越其在冬也則有楓紫  
平林黃葉半凋千山露骨萬木鳴條散六出兮銀世界  
拋柳絮兮凍瓊瑤豈無美酒亦有佳肴坐湖心而獨賞

樂孤縈之丰標此四時之氣象大都如是而夾湖之光  
景尤屬難描其山勢從西來發源天目五雲三台烟霞  
石屋蓮花玉岑嵯峨高矗蛇蟠鷄飛獅蹲虎伏龍翔鳳  
舞鴟張蝟縮飛來一峰來自天竺筆卓劍植下臨空谷  
青蒼玉削森立洞腹崑崙窈窕通明屈曲冬夏紛披上  
多異木迴環合抱兮湖益佳滌波捲雪兮世所獨其泉  
溪則有九澗則十八虎跑清冷真珠甘滑龍井冷泉著  
名古刹撫掌一勾石縫中豁羨百道之群飛俱旁通而  
四達其塔南北雙峙保所巍然雷峰一柱照日撐天其  
古墓則錢家兩代岳氏一門詩弔林逋之魄辭招忠肅  
之魂或心如皎日或冤類覆盆或表忠有觀或子鶴無

存俱堪筆之青史而附麗乎雲根其寺院則靈隱寬廣  
淨慈雄壯鳳林軒舉玉泉清曠昭慶則戒律精嚴雲棲  
則梵音高唱入門兮燈燭輝煌上殿兮泥金寶相莫不  
五體投地皈依無量佛名更有洞名蝙蝠坡號瑪瑙雲則  
可梯石則可寶碁盤一局造化奪巧藉田撮土故迹可  
考仙佛則最著竒幻林木則頗多猿鳥又有城郭參差  
萬家煙火三門並列芙蓉千朶夜半鐘鳴時聞更鼓玉  
蓮堂側則花月交輝柳洲寺前則龍頭畫舸望一片之  
玻璃抱玲瓏之珞珉此四山之梗槩尤足勝瓊樓而超  
紫府不覺塵衿爲之忽爽痼疾爲之頓捐尋鳥道攀松  
顛訪伯雨拜稚川壽星石畔兮小憇僊姥墩邊兮長眠

空明子文集卷之一  
爰作歌曰衆山環拱兮別有洞天  
下建三閘兮流水濺濺群仙來遊  
兮蹁躑湖波蜿蜒兮嬋娟唱踏歌兮  
一瞬千年何時與子兮同上湖船

登吳山望錢塘江賦

泛清波訪錢塘周孔道凌崇岡石級弘麗羨彼康莊  
峯巒秀拔觀宇軒昂瞻鳳凰之翔翥兮宛振翮乎遙天  
恐九苞之零亂兮紛毛羽之蹁躑映紫陽之瑞石兮洞屈曲而嬋娟  
架玲瓏之蒼玉兮駐煉藥之真仙既飛昇而留丹鼎兮猶疑文武之始  
然於是踏寶山尋窈窕叩山靈握泉竅草垂石而根歆樹緣崖而骨傲  
女墻閭寂兮鷓鴣啼澗道峭刻兮猿狖嘯爾乃陟吳山俯越江隔岸之  
峰纍纍渡江之楫洋洋眺海門兮不盈一線條潮長兮烟水蒼茫則見  
夫勢如奔波若織雲無停轡林麓崩坼海鶴高飛而灑雪江狔泛濫而  
點墨蛟蜃爲之起舞

鼉鼉爲之窟宅潮神則白馬朱衣水怪則魚頭龍額捲  
旆則駭浪倒立揚舠則驚濤裂帛若乃狂瀾澎湃飛湍  
瀉湟包山嚙隄折櫓摧檣三千之水犀縮手數百之強  
弩空張仰滔天之噴薄嘆旗鼓之莫當則見夫玉兔出  
震金烏入酉羅刹怒打定山俯首崩澗則沐浴日月漩  
滾則激蕩星斗弄風則雪山駕屋而來觸石則銀濤凌  
空而走爾乃揺天樞掣地軸轟雷震霆虎嘯巖谷或如  
黃鐘之驟鳴或如桴鼓之相續或如千軍之赴援或如  
萬馬之競逐或如鴈陣之群飛或如冤鬼之夜哭或如  
俊鶻之直落或如羊腸之幾曲此浙江潮勢之大概爲  
天下古今之所獨也已而浪靜風恬水光如鏡萬籟寂  
然下臨石甌撫明月而盤桓樂長天之雲淨漾蟾光於  
江水戀空明而弄影漁舟則寂寂不譁沙鳥則悠悠若  
醒望四山之聳翠瀉中流之清冷幸萬壑之朝宗奠洪  
流於永定

空明子文集卷之二

古婁李節珊先生選

華亭張

榮景桓著

我園賦

西苑王孫開疆拓宇壘石爲山引泉作浦構閭苑於平  
疇鋪金磚於別圃迴廊則鸚鵡高吟曲徑則蝴蝶低舞  
池畔之宿鷗跂足花梢之鳴鳩拂羽嶺上兮松籟如琴  
坡下兮磁墩若鼓萋迷裊柳樹之綠烟零亂落桃花之  
紅雨高原覆碧檜來鴈翅之名深洞飄香蘭著魚魷之  
譜於是踏大坂登崇崗穿花塢探墨莊怪石則層巒疊  
嶂危峰則軒舉迴翔鶴啄琪英意躊躇而立澗鹿銜瑤  
草足躑躅而登堂啓文窓之窈窕拂石几之清涼俯淵

鱗之潑刺鼓古調之悠揚轟轟竹梧才遮小閣低低梅  
杏已過平墻高館張燈宛似明星之燦爛重樓聞笛不  
殊天樂之鏗鏘鳥道盤空而窅窅泉聲激石而湯湯含  
香兮山麓吐秀兮池塘望皓月兮光連雪嶠對長林兮  
煙鎖花房若夫臺榭參差觀宇聯綿遠啞博望近笑平  
泉安石見之而羞稱韋曲王維對此而悔作輞川蕙圃  
芝田讓其華麗芳林金谷遜彼鮮妍休視爲小有之洞  
真較勝大羅之天東郭先生莞爾而笑曰旣與人而涉  
世寧於我而無園我不羨端明獨樂之恬澹亦不慕彥  
博曲水之潺湲研山則一丘何在辟疆則半壑焉存不  
若包含萬象會合一元法天之高崇長垣也則地之厚

培大坤也仁以布德草木繁也義以伐惡荆棘燔也禮  
以定位賓主分也智以燭物淵源深也爾乃雨露涵濡  
日月臨照雷霆抽其怒芽霜雪斂其積潦融春秋而運  
造化併翕闢而通微妙庶我園歷久而彌芳殆追踪至  
人之大道回視西苑之繁華又何啻太陽之與熠燿

浮雲賦

自太極之初判原窅窅而冥冥迨兩儀之奠位始氣肅而神清飄浮雲之一點本無臭而無聲暨旁散而突出遂有象而有形故朝得之而籠烟罩霧夕得之而掩漢遮星川岳得之而若無若有日月得之而忽暗忽明草木得之而紅愁綠慘雷電得之而著異標靈風雨得之而逞狂載濕蛟龍得之而泉湧山崩則見夫鎖陽臺連洛浦騫妙鬢吹綸絮在素成三呈祥著五仰扶日之輝煌羨升堂之容與旣分野之不齊按位表竒亦四時之各別隨時散布變朝暮於恍惚異水旱之吞吐又見夫酣宿露淡朝煙述曲渚冒層顛駭奔牛而浴豨還塞地



而撐天倏起而倏滅似斷兮似連或間同鷗鷺或疾比  
鷹鷂或渴虎跳梁於深谷或饑蛟騰擲乎平川或嬾龍  
曳尾於空際或衰鳳垂翼於窮邊或如丹蛇之亂走或  
如蒼狗之變遷或如魚鱗之輕薄或如鶴翅之縞鮮或  
如竒峰之孤聳或如天駟之盤旋或如蒼霓之圍軫或  
如白練之竟天或如金柯之燦燦或如玉葉之娟娟或  
如錦繡之交錯或如麗藻之相宣或如羣羊之躑躅或  
如赤鳥之踟躕或如懸釜之低墜或如華蓋之高舉其  
觸石而起也由微以至顯其含精而運也從偏而得全  
及當疾風之一掃要終歸於澹漠之坤乾我於此望浮  
雲之舒卷因悟人世之無弗盡然彼夫貂蟬覆頂華袞

章身物躬之浮雲也鳴鐘競食列鼎大烹適口之浮雲  
也絲竹悠揚清歌發越樂耳之浮雲也柘枝雙舞絳樹  
纏綿悅目之浮雲也金車鏘鏘寶馬得得代步之浮雲  
也床飾象齒几嵌珠貝佚體之浮雲也燕姬盈前趙女  
充後縱情之浮雲也商彝周鼎漢玉柴窑玩好之浮雲  
也峻宇雕墻重臺複觀第宅之浮雲也黑白之鷹韓盧  
之犬遊田之浮雲也異木千章名花百本苑囿之浮雲  
也珍禽鼓翅錦鱗泳波池沼之浮雲也平泉蔓草金谷  
荒烟別墅之浮雲也題名雁塔一歲九遷仕宦之浮雲  
也凌烟何有銅柱徒存勲業之浮雲也人方沉迷於浮  
雲之中而莫省浮雲之惡况我獨靜觀乎浮雲之外究

亦未能名浮雲之萬狀

竹夫人賦

祝融司令時當溽暑日躔鶉首音比大呂看腐草之化  
螢聽莎鷄之振羽惟鑠石而流金畏紅輪之若火倚北  
窓而寄傲柰揮汗之成雨忽有人焉叩我柴扉碧玉作  
骨綠羅裁衣情綿邈而自遠體輕盈而欲飛不施膏沐  
亦絕癡肥問其世系則淇濱之望族稽其封號則郡國  
之名妃何爲乎衣裳之不整對溫風而若有餘歎豈其  
懼孤眠之無寐願褰帷而與我同歸不覺豁煩襟開懷  
抱拂文石兮榻幽展芙蓉兮帳小橫紅蕤兮枕微涼鋪  
桃笙兮簟若縞爾乃傍重陰臨曲沼捲圍屏發長嘯仰  
天樂之遙傳鼓別鶴之一調於是引君入我之堂抱君

登我之床低徊顧盼口體生香玲瓏娥媚弱質纖長同  
楚女之細腰類公子之無腸林下之風堪挹清標之致  
如霜誰慣妖淫偏招蝴蝶豈知嫉妬莫礙鴛鴦無足可  
持固寵則偏同漢宮之合德有儀可象牽情則較勝天  
津之窈娘若夫直道持躬緘默自守既不慕樊素之櫻  
桃亦不羨小蠻之楊柳一琴一几伴我虛牖湯媪見而  
低顏龍拂望而卻走照明月而寫予素心俛冰雪而謝  
彼紅友爰景白雲凌清霞引商刻羽沉李浮瓜驅熱則  
揮辟塵之扇解渴則烹僊掌之茶疏風則高陰千尺梧  
桐飄香則遠眺十里荷花莫不置君於膝並臥同車拋  
卻是非之心屏除人我之相峭厲則丰裁天賦屈折則  
經營意匠正堪伴我水晶壺雲母障軒軒獸頭之鑪曲  
曲鳩形之杖墨池之龍尾分明管城之兔毫酣暢無不  
幽閒雅靜風流跌宕更可喜者含情高曠侵肌則何妨  
褻狎貼肉則豈嫌放蕩任人調弄樂而不淫獨宿未能  
淫而不浪是此君絕俗之孤貞原不隨風而飄颺雖圓  
通而若轉總不勞人世之疑謗已而夜闌秉燭微月半  
明若嚙若笑結契定情蟲鳴唧唧四無人聲邀我同衾  
與我聯盟滑膚膩理潔潤輕清羨爾傲骨忘彼浮名庶  
一椽而與君共隱又何樂乎十二之層城

一對而... 空明子文集卷之二

秦望山賦

瞻濱海之崔嵬邀祖龍之遐眺標秦望之雄稱鎮要荒而寄傲散歡意於晴容含愁情於雨貌於是循山麓登山嶠發浩歌抒長嘯鷺鳥盤空金羊山縹緲秋光明淨水波微妙望大海之浩瀚若平疇之積潦捲赤浪兮接天漾洪濤兮落照爾乃叩禪扉憇古廟穿石逕尋芳草嗟一物之渺然乃長生而不老何斯人之至靈反難臻乎壽考因嗜好之雜投致潛銷夫鴻寶訪深穴於山腰探僊源而莫曉雲翳翳而上昇鳥喧喧而低噪朱砂礪側不聞蟋蟀之聲白堊洞邊但餘蚱蜢之越墳前翁仲俯首無言道左老人垂頭若笑一堆高聳層累架空何

日飛來膺茲雅號時當秋半欣禾稼之油油日乍西斜  
怪寒蟬之悄悄荒鷄鳴兮聲益淒野犬嚎兮尾獨掉四  
顧總蒼茫查山入懷抱羨玉成之修煉免青蠅之夕弔  
躡丹梯以登仙期與君爲同道遨遊乎蓬瀛泛濫乎瑤  
島結西母於崑崙戲東王而歡笑招群僊兮偕來歌清  
商之水調心纏綿而難盡託遐情於天表

三昧庵賦

伊茸城之西北結三昧之名藍傍石塘而締造背崑山  
而面南外則殿宇幽雅中則法象莊嚴園種千竿之竹  
盆栽四照之蓮寒梅則低枝壓帽古桂則老榦侵簷禮  
懺崇朝但有和風入座談文深夜只餘明月穿簾爾乃  
轉曲徑下平坡舒長嘯發浩歌窓外喬松偏名羅漢塔  
前小草亦號頭陀仰百尺之柳槐烟迷古道俯一池之  
菱芰風蕩清波靜莫靜兮野花開幽莫幽兮山鳥多臨  
小橋而獨坐不覺紅日之倏過於是品名泉對青嶂興  
益豪神愈王東望瑤臺景崇岡之閒曠西瞻貝多羨梵  
宮之雄壯一碧萬頃三泖爲之陂塘層嵐疊翠九峰爲

之屏帳群推書癖隱能長老之沉酣共許詩狂惠白上  
人之清暢况白足桐雲之繼武俱堪媲美支公而稱無  
尙若夫臨流啓戶編槿作牆春桃發種菘之圃秋菊紛  
納稼之場燕語呢喃於小院鶯聲睨睨於垂楊花幡飄  
颺乎寶座鐘鼓陳設乎禪堂自有佳肴厨烹玉版之潔  
豈無供佛茶泛紫茸之芳欽寒暑之勤修木榻則棲心  
淨域觀晨昏之課誦蒲團則稽首法王金爐焚兮香靄  
凝銀燭燒兮光焰長宜乎富商大賈之裹足不至士人  
君子之寤寐難忘庶幾早訂白蓮之社以尚友乎高隱  
之柴桑

### 九峰賦

稽九峰之發源兮根由天目歷震澤而蜿蜒兮澱山遙  
續洪流西來而奔注兮滙華亭之長谷開九峰之門戶  
兮疊青葱之幾簇於是捨輕舟緣林麓上崑岡曠遐矚  
仰殿閣之穹窿俯璘珣之白玉瞻黃州之司馬孤碣兮  
摧頽弔晉代之將軍一堆兮高矗晴光瀲灩兮邈水清  
野花零亂兮巉崑馥形如覆盂圓秀幽獨不假附麗光  
潤若沐看鷗鷺之群飛向沙汀而競逐爾乃渡曲澗登  
橫雲崩崖無縫斧劈有痕臨雪堂而鶴鳴殿脊坐采蓴  
而燕語時聞上有古洞烟靄紛紜白龍奮起晨暝晝昏  
探之則深通薛澱祭之則霖雨狂奔別有隔溪對景片

石驚人方渠赤壁恨少子瞻之賦斬然一罅色同絳蠟  
之焚若夫洲渚滌迴有類圖畫因士衡以得名發辭華  
於光怪陂澤則環遶其南村落則散布於外平原臺上  
已絕讀書之聲叢木祠邊但有喬松之籟悲八洛兮世  
無聞鶴唳誰聽嘆大風兮空折木女蘿如帶雖三尺之  
童皆知哭內史於黃昏一拳之石亦終歷千古而不壞  
其有傑然高出狀似天馬干將鑄劍於前給事題詩其  
下香飄美醞含情則醉倚紅袞絃動哀箏寫怨則音浮  
綠野來鶴軒空兮聳峙西偏雙魚石化兮坳潭色赭洗  
甘泉兮目明鞭玉虬兮聲啞琳宮寶殿兮佛像莊嚴竹  
几木榻兮禪房瀟灑景二高士之孤墳自足以厲清標

而振風雅至於表竒八景別號神鼉細林則易名天寶  
道院則創建崇阿洞口之春雲何在西潭之夜月恒多  
金沙夕照還漾石灘之屑崇真曉鐘猶和牧童之歌尋  
古碑而懷義士生今時則誰能容得汲丹井而酌靈源  
在當日則道友來過仙蹟餘素翁之冢晚香空蒔菊之  
坡莫不玩春山之紅雨泛秋水之綠波若乃踏余峰覓  
虎樹日映竹兮微涼風入林而始怒峰高聳而峭拔路  
崎嶇而回互鳥音悅耳淡我名心天籟遙傳開人覺悟  
秀尊者之焚修一塔依巖聰道人之卓錫二青夾路沐  
堂之茶若紫茸洗心之泉同甘澍靜看則東西兩峰遠  
望則籠煙鎖霧亦有山人卜居雅士作賦立斜陽而興

感未免嘆風流之已故不覺薛山在望峙我當前亭亭  
獨立約素娟娟似苧蘿仙子在浣紗之日西川卓女當  
滌器之年但有老烏啼木山花兮寂寥自吐狡兔穿窟  
岸柳兮偃仰徒鮮琅玕挺秀兮遮玉屏之一角碧藕敷  
榮兮冒羅池之四邊宜乎薛道約之盤桓不去終身棲  
老乎其間折而東煙朦朧攜竹杖帶詩筒覓陸寶之別  
墅探金碧之玲瓏悵樓臺於不見拊石骨而無從彷彿  
夢神女於高唐旣行雲而丰姿莫覲依稀遇靈妃於洛  
浦乍凌波而後會難逢共羨土肥二峰變嵯峩爲平陸  
只餘春靄一溪流慘澹之落紅今旣見飛去之山益信  
有飛來之峰漫躊躇而無語漠然徒對碧草之叢叢乃

有延頸振翼宛似鳳凰徵名果是若翺若翔問爾何不  
展九苞而儀於帝世何不宣五彩而鳴於高崗徒向海  
濱而匿影雌伏於吳王射獵之塲豈其覽德輝而驟下  
因一跌而氣不復揚徒使山鬼躑跳於一足毒蟒噴薄  
乎閔塘古墓壘壘而碁置松楸鬱鬱而蒼蒼野鳧則漁  
磯獨立小犬則吠斷夕陽俾聞之者自當驚魂而動魄  
見之者莫不涕泗而沾裳此九峰之部位如天上之雁  
行品題則凌嵒爲始吟咏則惟善頗長論道里之阻修  
無非二九爲最計高低之丈尺不過八十爲強若斷若  
連兮誰能描畫忽起忽伏兮未可測量引湖波以潤澤  
兮瞻何草之不芳峙茸城之西北兮若錦障之平張萃



千年之秀氣兮發二陸之文章歷百世而莫與京兮又  
何必九嶷之在瀟湘亂曰山何纍纍兮雲間之山未易  
枚舉兮垂絲雙檜鍾賈珍兮一水中隔廬山高兮寶函  
藏書庫公隱兮周環如城杳難攀兮三姑著靈柘山荒  
兮巔生異草秦望遠兮煉丹海上查山名兮斨山之洞  
窅且深兮福泉之水清且甘兮金羊諸山海中央兮回  
視九峰終不可及兮

三泖賦

考長谷於當年淪由拳而爲泖瀉笠澤之汪洋承薛澱  
之浩淼眺洪流於無際綿百里而未了缺地勢於東南  
翻煙波於天表映青山之九點蕩雲霞於縹緲於是擊  
桂楫泛蘭舟漁歌隱隱牧笛悠悠白蘋貼水紅蓼凝眸  
掛蒲帆而直下儼圖畫之畢收寄遐情於高矚覽一覽  
之難周楊柳兮夾岸荻蘆兮盈洲蓉娟娟兮酣湛露桐  
瑟瑟兮辭素秋或圓如明鏡貯一盆之綠油或大如沃  
野鋪積雪於平疇或長如銀漢颺素練於浮漚東達葑  
澳走馬西通金澤白牛南則洙楓兩涇分支宣洩北則  
大小二蒸合抱綢繆爰收筆床下魚釣狂飛孤鷺驚奮

閒鷗木蕭蕭而碧減草瑣瑣而青留雲淡淡而意懶蟬  
瀏瀏而聲幽則見夫清波漾空澄流落鵲輕風徐來光  
動毫髮簸弄不定激蕩日月噫氣沸騰狂濤怒發立陽  
鳥於沆瀣擲陰兔於澎渤跋鼈跳波穹龜噴沫豎鬚來  
化蝗之蝦招手多祭魚之獺釋龍之飛霧蒼茫老龜之  
攻岸恍惚郭索執穗以睢盱華魴躍浪而潑刺別有天  
清氣爽水雲若虛綠披荇藻青簇芡蒲上泛紫絲之蓴  
下多白小之魚落實則有沿塘之菱芡看花不乏綠渚  
之芙蓉載沉載浮群誇巨口之鰕以游以泳共羨四顯  
之鱸光射斗牛兮含珠之蚌形同鸚鵡兮戴殼之螺瀾  
鴻則雙棲交頸鷺鷥則獨立常孤爾乃上名藍登寶塔

聊引領而四望收湖光於一霎送朱鳥之冥冥候冰蟾  
之曄曄看素娥之弄影對菱花而生靨似西子之入吳  
帶啼痕而未愜疑巫峰之神女擁朝雲而出峽宛蘭香  
之通問悵花鈿之斜插同雲英之玉瑩當裴航之乍接  
秋露霏霏秋風颯颯世事等浮雲之卷舒陵谷類桑田  
之崩塌何爲乎萬井之俱沉僅存掌大之一葉峙古刹  
於中天矗危樓於雜沓聳丹青於浮圖耀金碧於眉睫  
飛點水之蜻蜓戀穿花之蛺蝶石梁則影若垂虹復閣  
則美如輔頰拋三千顆隋侯夜光之珠懸數百頃飛燕  
萬年之蛤遮不盡雲母之屏藏不完水精之盒走億道  
之金蛇搖晴影而目懾仰望嫦娥於天半依稀笑語之

空明子文集卷之二  
三  
恰恰意纏綿而欲下恐濕凌波之繡襪又如聞嘆息之  
餘聲恨清冷之莫涉呼龍女以執鞭駕赤虬以振鬣邀  
仙馭以來遊踏琉璃之幾匝恍天樂之旋迴假丹梯而  
上躡倏寂寥以鮮歡寄閒情於一榻誰云冬溫而夏涼  
我欲啓九天而問閻闔

掃墓賦

泛扁舟於江渚展先子之佳城盼長堤之烟柳拋萬縷  
之縱橫扇和風於衣袂翻麥浪於丘塍任布帆之高挂  
旋繫纜乎沙汀望墓門而趨謁瞻怙恃之奚能其爲地  
也臨曲沼坐官涇踞石梁抱草亭栢高巢鵲松暗啼鶯  
一行一行兮籠烟鎖霧千株萬株兮蔽日遮星封如馬  
鬣不虧不崩巍然若堂寬廣昌明凭高四眺厥狀難名  
其北碧波東注泗水清冷古刹雙峙巨鎮雷轟屋密則  
不殊魚鱗之比人喧則有類鳥雀之聲其南十里平疇  
煙靄微凝市井千家之散布牛馬二橋之頻仍遼濶兮  
不見半村之烟火空曠兮能容萬馬之奔騰其東盤龍

空明子文集卷之二  
四  
環遶潮汐送迎並三岡之急流而滙申浦通六磊之古  
塘而瀉滄溟莫言迂緩八十餘里之遠實彷彿天矯屈  
曲之龍形其西天馬高聳按轡揚鈴影插霄漢全體畢  
呈幾與九峰同其遙拱似欲向茲山而並其崢嶸於是  
命彼僕夫潔爾粢盛三鼎特設庶羞咸登清酒旣獻綏  
予思成恍有言而若吐囑小子之守貞保令名於勿替  
莫枉道而遄征兄及弟兮早去世泰山重兮鴻毛輕風  
悠悠兮聲寂寂雲淡淡兮烟冥冥憶考妣之音容魂恍  
惚而難憑乍聞言而驚愕宛殘夢之未醒迨拭目而凝  
睇知神眷之有靈再進爵兮心怦怦游絲十丈兮裊新  
晴愧無簫管之疊奏幸聞鳥語之嚶嚶三進爵兮通我  
情神嗜飲食兮聽和平予一拜而一祝兮庶期孫子之  
傳經終進爵兮酒杯傾酒杯傾兮神聿興予再拜而再  
祝願神之悅豫兮以保我後生



